

萬

曆

疏

鈔

萬曆疏鈔卷三十三

修省類

鄒元標 國值非常災異懇乞加修省疏

主士性 火災示異乞樽玩好疏

丁此呂 極陳修省之實以弭天變疏

張維新 祇承德意敬獻朴忠以禪修省疏

王 璘 感時修省敷陳政務切要疏

劉曰梧 敬祖畏天亟圖修省疏

馮 琦 謹天戒憫人窮以保治安疏

劉綱

天災重見乞加修省疏

余繼登

禁地火災頻發乞痛加修省疏

魏允貞

遇災思懼直陳時政之缺疏

史學遷

早圖修省以格天心疏

白瑜

天災疊見非常聖躬憂勞甚切疏

李三才

天變人離萬懇省改疏

汪若霖

天時太亢乞裁省以凝休命疏

汪若霖

洞察天人之故以儆有位疏

趙世卿

天怒人愁直陳失政以弭異變疏

汪若霖 靈雨異常亟勅交修以回天變疏

趙世卿 懇行實政疏

宋一韓 都城水災異常時事可駭疏

楊道賓 陪京災沴異常疏

萬曆疏鈔卷三十三

修省類

國值非常災異懇乞聖明嚴加修省以答天心

疏

鄒元標

吏科給事中
萬曆十二年正月

臣聞漢臣云國家將有失道之敗天乃先出災眚以譴告之又出怪異以警懼之不知自省而傷敗乃至見天心仁愛人君無已者恭惟我皇上仁厚性成睿智天挺孝奉兩宮則情文兼隆恩覃萬彙則枯槁回春未明而衣嚴寒而朝臣方欲歌誦盛德乃者

月二十二日內庭火災延燒慈寧宮一時煨燼至虜
驚聖母憂勞聖躬皆臣等奉職無狀所致罪當萬
死除痛自修省外然臣等竊惟天下未有無災之國
顧人君所以修德者何如耳能修德則反災爲祥不
修德則禍立至而不可解臣伏讀漢儒論五行曰極
陰生陽不旱則火又曰君不思道厥咎災宮是則天
變之興亦人事之未修歟臣謹將死陳爲六事皆上
關君德關係國是最急者惟 陛下俯賜省覽昔人
所謂事天以實不以言應天以實不以文臣不敢勦

儒生迂腐之談亦不敢引窒礙難行之事倘蒙留神

國家幸甚臣等幸甚緣是國值非常災異懇乞聖

明嚴加修省以答天心事理未敢擅便開坐謹題請

旨計開臣白保聖躬臣聞千金之子坐不垂堂誠重

之也矧陛下握符御曆前而曾祖宗之統緒後而

神聖之國祚貴係陛下臣一身宜何如致慎哉慎之

云者匪偃仰屈伸煦呼吸之謂也惟在緝熙聖學

而已先儒云緝繼續也熙光明也有一毫間斷非緝

也有之毫暗昧非熙也緝熙聖學必先無欲臣書

無欲之訓 陛下俯垂嘉納 陛下試自修省無欲
耶寡欲耶詩曰鶴鳴九臯聲聞於天又曰鍾鼓於宮
聲聞於外蓋言誠不可掩也語云欲人勿聞莫若勿
言欲人勿知莫若勿爲 陛下誠宜翻然自省矣何
者人之血氣當壯盛之年而節省之則易爲力及凋
耗之日而培養之誠難爲功 陛下今一年嗇而千
萬年長齡從此始矣臣之於君猶子之於親子祝其
親必曰百年壽考臣祝其君必曰萬壽無疆 臣誠願
陛下寡欲以緝熙聖學緝熙聖學以保聖躬伏乞

聖裁一曰親臣工臣聞巍巍惟天然必下濟而後光明故自古君臣未有一語不通而能相與有成者曩臣進召對之語蒙陛下俯垂嘉納迄今數月猶未舉行此必有爲之說曰人君其尊如天必尊嚴若神始無失居尊之體不知有尊嚴之名有尊嚴之實務其名而去其實則亦非所以尊君矣故大臣欲獻替其間而動多掣肘者羣臣欲糾正其間而事難上達者尊卑睽越情旨罔洽上德阻滯下情塞鬱徒牽制文移繆悠歲月而已當茲天變陛下誠宜惕然自

省每朝講後將羣臣所上章奏召諸大臣一一講明如吏部職在用人其進退賢否試一訪詢戶部職在會計其出納盈縮試一稽查禮儀之隆殺邊報之虛實刑獄之出入工作之興廢務根極源委商確利弊有獻可而不以爲同有替否而不以爲矯要共成一代和衷之美而已先是臺臣楊四知所上三錄召對其一聞 陛下宮中留神省覽此正 祖宗時故事所宜率祖攸行以親臣工伏乞 聖裁一曰開言路臣聞言路通塞係世道之興廢自古端人正士立朝

惟惓惓以開言路爲請彼誠見理亂從茲而出故也

始

臣

等或起廢缺畝或起身行伍海內喁喁想望太

平乃未經數月以言事落職者五人方取之而遽斥
之方起之而遽譴之載之史冊傳之後世可爲寒心
雖其所言不無過當然亦非全無保身者比使謀國
之臣居全軀者之名人雖至愚必不肯以身爲犧牲
矣臣往讀留都科臣疏云士氣之屈者蓋已十年今
幸得伸言路之塞者蓋已十年今幸得開不覺攫然
旋開而塞旋伸而屈則宜忠憤之士扼腕而談而閤

沕之狀難於畢達也當茲天變 陛下宜廓虛受之
量下求言之詔庶幾忠謨嘉猷盡心而獻闕下者濟
濟無窮矣然欲下求言之詔則莫若以言官爲之招
或復原職或受京秩增朝端正直之風助臣工敢言
之氣此曠古之盛事而諸臣之所翹企也伏乞 聖
裁一曰諭百官 臣聞書曰先王克謹天戒臣人克有
常憲百官修輔厥后惟明明天心示儆明君固當恐
懼修省臣子亦安能晏然無所事哉古人立朝不苟
焉以求同惟蹇蹇以謀國今有大繆不然者則脂韋

風熾而奔競之習成也立譚間以遊戲微逐爲本業
以流連詩酒爲高致回視古人何啻霄壤臣請卽近
時人心爲陛下鏡之如議減宮一事昔言可減今
言可增矣如處言官一事昔言可恤今言可死矣如
處故相一事昔言可死今言可恤矣如者稱伊呂今
異同唾之矣昔稱恩師今仇敵視之矣一人之身前
後背馳爲鬼爲域不可測度猶且悠悠策馬迹遍公
卿以軟熟爲工以謀國爲迂有臣如此國奚賴焉臣
願皇陛下勅百官洗濯乃心如大臣須務立朝之節

小臣須敦廉靜之風各供厥職無論唐虞三代卽如
弘正間風俗淳朴亦可覩記矣夫國運之隆替係士
風之邪正士風之邪正係國家之振作臣誠願 陛
下諭百官以懲薄習伏乞 聖裁一曰節財用臣聞
國家資財用猶人資食以生民無食卽死國無財則
匱 陛下躬先浣濯仰追列祖臣猶有說焉臣覩庶
民之家有百金之積者歲支十金不過十年而止歲
支百金不過一年而止善蓄積者以一年爲百歲之
計今夫司農告匱矣如年來恢復慈宮鼎建山陵大

役竝興動需不貲取之西北西北饑荒聞者酸鼻取
之東南東南水旱見者寒心非大有撙節膏脂易竭
臣懼難繼矣如江西燒造無益實用者止之可也蘇
松織造非係緊急者停之可也其它不急之興作無
名之賞賜盡爲禁止以彰德意至明也以培國脉至
仁也若不大加損益其間雖桑孔復出不能持籌而
笑矣易曰節以制度不傷財不害民節用一語誠今
日經國者急務伏乞 聖裁一曰拔幽抑 臣聞民含
陰陽之氣常與天地相爲流通民心和順則天地之

和順應之民心乖戾則天心之乖戾亦應之言民能以氣上千故也匹夫含冤三年大旱一夫呼天六月飛霜今鳳陽高墻所禁宗室罪人不知凡幾矣誑誤致譴其苦可矜也 陛下臨御屢下寬刑之詔遠方凶豎猶蒙貸死況以 皇室懿親忍使之羈囚而就死乎今後宮所積宮人不知凡幾矣由壯而老者其情可憐也 陛下臨御屢布寬仁之條草木羣生皆能自樂況內庭幽婦忍使之孤苦以終身乎夫生生而不已者天地之所以爲大德也一物惟恐傷者人

君之所以爲至仁也臣願陛下沛然降德音勅所
司於宗室審其罪有可原者盡行疎放於宮人酌其
年力已壯者量爲釋放天心有不克順嘉貺有不薦
臻者未之信也伏乞聖裁

火災示異乞樽節玩好以弭災變疏

王士性

禮科給事中
萬曆十二年正月

臣待罪該科日接今歲四方守臣所奏襄漢荊鄖數千里洪水關隴地震吳越苦歲祲薊門上下流火遍營壘杆斗有光俱經禮部具題蒙 皇上嘉納飭大小臣工而修省之矣至本月十八日聞內官監爲傳奉事開稱元宵節乾清宮等宮女設鰲山等燈揭帖行兵部取用該營官軍二千員名完日回營臣方欲一言然念災異猶四方也 輦轂之下萬姓之集

皇上樂以天下似不爲過至二十二日夜驟觀火變
次日聞 慈寧宮并週圍房屋悉皆燒燬臣不勝駭
愕隨班奉慰切念慈寧宮 慈聖太后所居也一旦
變起眉睫驚恐 聖母致厘 宸衷此變之大也不
止四方水旱之災矣昨又捧讀 聖諭諄諄已深警
惕復申飭中外臣工省愆思職臣等仰承 皇上修
德弭災至意敢不夙夜祇愼然未聞本監傳罷燈役
臣復敢冒昧臣聞古者 聖王遇災而懼避室減膳
御地不懸馳道不除故稱堯臞舜瘠禹胼胝則飲食

服御尤且節之矧于玩好無益之事故臣謂鰲山燈
火雖小事而修德弭災當自此始臣請得而終言之
夫火無常性惟其所觸今烈焰為災既已駭人觀聽
矣若鰲山燈一設烟火騰空飛旋橫躍觸木遇石如
鼎斯沸一或風霾不測大災難收豈不可慮禁地雖
闊理宜預防似當罷之以謹 宮掖不虞之備慈宮
既燬大工當興土木工程度動數十萬卽鰲山所費
取之內帑然 皇上日者賞賜業謂內帑缺乏暫借
外庫而今大倉光祿工部太僕之入僅僅適用可惜

傾數千金之費充一夕之玩而無餘也古有露臺惜
百金者而此一燈又不啻中人十家之產似當罷之
以節 國家無經之費戚臣新喪 聖母震悼天性
至戚卽萬舞爲樂必有怫然不安于內者似當罷之
以體 聖母哀戚之心抑又有進于是焉大君天之
宗子也父母震怒子雖無過亦不敢自爲寧居今
宮庭之災固近待怠玩之過已其之法矣第變不虛
生意者 上天仁愛假此以示之警有如 聖諭所
及乎則 陛下尚當齋居默禱澄神易慮古者永巷

脫簪彤管紀過贊御獻箴凡以慎密勿而謹天戒也
故麴蘖不旨柔曼絕御彼星橋火樹旋舞踉蹌快意
當前畏心遂却非所以罪負引慝也故又當罷之以
答 上天警戒之心昔太戊修政三日而祥桑自枯
景公修德一言而熒惑退舍至今以爲美談甚哉天
人之間不可誣也 陛下睿智所照旣深警惕自能
不俟 臣言然 臣偶有傳聞乞 勅內官監罷之便

極陳修省之實以弭天變疏

丁此呂

山東道監察御史
萬曆十二年正月

臣惟天心仁愛人君必出災異以譴告之而閭於修省則事應必至立見修省而不以實勝則天意亦未易回故災異者上盛之世所不能無亦明哲之主不以爲諱也是故事天以實不以文弭災自近以及遠斯可轉災爲祥移禍爲福稽之往牒一一爰符臣伏覩十二月二十二日慈寧宮災夫慈寧聖母所居而陛下所自出也一旦及於災此豈可以尋

常天變論哉惟時大小臣工以逮士庶靡不驚惕失色跂聆德音冀回天意本月二十四日伏蒙聖諭傳示修省卽古者哲后之遇災而懼何以過比禮部所開合行事宜不過循往年齋戒故事而修省之實未必言之具也竊皇矣上天夫豈區區弭文木節所可遙格乎不敢泛舉遽引以瀆天聽謹上關天主德下切時政人人所欲言而不敢久欲言而有待者列爲五事昧死披陳伏乞聖明留察立見施行計開一曰慎舉動竊惟朝廷之舉動

治道之欣戚內而宮禁從違褻如近習窺伺咸于一
舉一動間係之故方意念之萌若以爲細微而可忽
及其惟意所指由微至著以極於盛所關係良非渺
淺也 皇上天縱聖神游心經史動與道合曷少有
愆惟是意向偶有所之情好偶有所失檢點偶有所
遺防制偶有所馳則亦不免有一二舉動未與天游
而 陛下亦不自覺者 臣願 陛下維自保 聖
躬如寶玉莊燕居如廣庭一言一動必中法程一頓
一笑毋示利器尊奉 兩宮不專儀文之備軫念萬

宇亟罷不急之需如目前撤鰲山之燈明春止

壽宮之閱江西停磁器之製蘇松節織造之工一切
無益 主德而有關民瘼者必慎乃儉德以明示中
外斯微無不謹隙無所投 聖德日光而天心自順
矣伏乞 聖裁 二曰弘聽納臣惟主聖則臣直故
直臣者聖世之所珍而志士之所則也往自故相擅
權直臣中禍言路壅塞讒諂成風幾至大壞極弊不
可揅藥幸而天啓 聖衷慨納臺臣江東之李植楊
四知等諸疏盡斥羣奸大彰法紀而又立還建言貶

竄諸臣吳中行趙用賢鄒元標艾穆沈思孝等於朝
晉之顯秩以樹賢旌都人士仰見聖意所向如此
無不人人思奮自效清時乃未幾時而馮景隆孫繼
先曾乾亨黃道瞻孟一脈五臣竝一建言相繼斥逐
豈非朝夕頓殊哉夫諸臣之言敢謂盡當然皆以建
言逐也而又當人心改正之初欲中人之資屹不爲
動而永貞初心也蓋亦難矣要所繇終漸可長慮臣
願陛下鑒拒諫之積弊堅容直之令圖賜環諸臣
以風庶吏而又乘此遇災之時亟下求言之詔使

大小臣工曉然知聖意所向終如此毋自疑阻以
長邪風卽古有狂直未當者亦必曲示優容以伸士
氣臣聞宋仁宗時以日食風災廣開言路而當時言
事者至有天下非陛下之有等語其無忌若此而
仁宗亦不加罪史冊至今以爲美談陛下仁聖上
軼舜禹豈仁宗可希萬一則所爲容狂誣以明能恕
者而知陛下且遠邁仁宗萬萬矣宗社生靈甚
幸焉伏乞聖裁三曰正典刑臣惟朝廷所以
勸懲天下者惟刑賞刑賞自朝廷而奉若以天道

故賞曰天命刑曰天討天之所定人可撓乎先是故
相誤國逾保明奸游七以家奴而弄威福徐爵以
逃戎而汙禁地以至下逮厮養爪牙如馮昕龐清
等羣擁爲梟惡噬如虎幾至禍天下刑賞至此僭濫
極矣陛下俞言官之請赫然電斷立逐逾保窮治
羣兇薄海內外靡不欣喜相告若撥重雲而覩朗日
也然逾保罪待顯戮而陛下猶念大馬微勞僅從
斥逐游七徐爵等法當立誅而陛下猶待秋後決
期始正典刑天下之人無論識不識靡不欲旦夕及

期其必羣虎而寢處其戾也逮至法當決期不謂適
遇古典窮兇大憝竝蒙一時緩死之恩人心不察遂
以爲羣兇可不死而逾保可復還窺伺觀望潛長故
智覲燃死灰嗟嗟人心如此天其謂何夫大青皆肆
春秋致譏見惡不去聖經爲誡卽方春時和未宜行
辟亦乞 陛下明示必殺以待來秋決期仍乞嚴諭
逾保俾自爲計毋致噬臍厚負 聖恩則典刑旣正
天討斯彰輿情大快天心格矣伏乞 聖裁 四曰
去倖位臣惟天下之治衆君子成之數年而不足一

小人敗之一日而有餘故去惡脫距取善拔茅慶曆
所以具歌石介所以忤時也夫火者天上除舊布新
去穢而昭潔之象故相之黨其失奸迹穢逆人耳鼻
者今以戍斥而孤域之資臧婦之勝身爲兩面之羞
色借兩姑之譽居正穢逆之時既用之以佐奸清朝
朗霽之時復容之以充位浮雲點漬足混太清蜺螭
在傍終虧日耀臣恐其逢迎委曲潛以回正士之腹
熒惑調停復更起前奸之鄙此治亂之關而人心之
所炯惕也臣願 皇上明示輔臣蒐慝保善芟治根

株無使滋蔓以終雪白維新之治伏乞 聖裁 五

曰清近侍臣惟禁近內臣日侍 皇上左右大而樞

密文書小而飲食服御咸此曹典之其跡至暱而其

責亦至重也然盈數萬薰籠同器忠佞奚由辨焉惟

邪佞者得志以逞則雖有抱 主之忠亦無繇以自

見矣是在察之於微辨之於早卽有大奸匿終有所

憚而不敢肆久且可習與爲善厚有令終雖制馭之

實以保全之也頃者曹祿不慎致災內庭此非平日

敢於怠肆不畏法度何由至此 陛下卽杖之百藉

其家亦安足償所失萬一哉臣願陛下繼自今嚴
諭此曹恪奉天憲辨別忠佞明示軒輊撲邀者庸
狡佞者斥馴默者庸滑飮者斥能諍拂者庸善迎合
者斥一有欺悞必以其罪罪之母從積譴乃勤聖
斷彼見皇上甄別不淆賞罰必信疇不願得一當
聖意保全富貴久遠也臣聞成弘間太監懷恩金英
輩雅能事主以道保護直臣阻抑非類厥功不細遇
不如意輒嘆外庭無人卽列之士紳尤稱賢者借今
左右皆若人誰與爲不善乎頃自逆保旣逐覆轍在

則曹祿重懲人心益惕惟陛下指嚮間不患無
恩英輩踵出矣災旣自內起則法當自近行是亦弭
災之一端也伏乞 聖裁

祇承德意敬獻朴忠以禪修省疏

張維新

兵科給事中

萬曆十三年三月

竊惟人君以天之心爲心故遇災思懼者哲后之軌也人臣以君之心爲心故因事效忠者盡臣之猷也臣伏覩我皇上敬天勤民惟日孳孳頃以春和屆期亢暘日久恐妨農事乃發德音下明詔禁屠虔禱與大小臣工共圖修省卽此皇上一念之誠自可感格蒼穹坐需霖雨之降臣復何贅顧臣以言爲職也皇上欲舉修省實事而無片言以助警惕則失

職之罪是又

臣

之所懼也請以膚見一二爲我皇

上陳之一曰推用忠鯁以杜壅蔽

臣

聞君仁則臣直

又曰國將興賞諫臣故聖王欲臻上理舍忠鯁之士

無繇也何者山有猛獸藜藿不採朝有直臣奸宄不

生則忠鯁之於人國誠無負矣我

皇上勵精圖治

虛已受言卽古稱從諫弗咈之聖奚能過之續復允

言官之請起海瑞于巖穴之中大海瑞之在世廟蓋

以直言忤主久被擯斥者也

皇上鑒其忠且旋晉

卿貳遠近臣民莫不忻忻然頌清朝之有盛舉也若

此臣思今之以言得罪者不止一瑞而所望於皇
上之超拔者亦奚獨一端而已哉如原任給事中鄒
元標黃道瞻馮景隆伍可受者類能吐讜論於禁闥
御史孟一脈曾乾亨孫繼先譚希思范儁者率皆播
直聲於霜臺乃相繼斥逐輒遭禁錮羣情扼腕者久
之近吏部以叙遷請旣未得旨給事中李以謙陳壁
交章疏薦又不蒙允豈以數臣非瑞之比耶語云直
道難容正言難入彼此先後如一轍矣若不及今優
處則不但聞風觀望者以言爲諱而我皇上召起

海瑞之令名亦未免因此而少掩

臣

欲我

皇上益

廣令名而不欲其掩也乞勅下該部將鄒元標等分別擢用以作蹇諤之氣以慰中外之仰二曰慎用撫臣以振紀綱夫國家於要樞重地必置撫按大臣令開府而鎮之任至重也故誠得其人則拊循有方無事屹如山嶽而慮患消崩之計常周有事沛若江河而制危定變之策立就不則平居猶足以自支一遇事變軍民驚愕手足失措幾至於潰敗決裂而不可救

臣

入兵垣以來見前歲浙中以民變報去歲平樂

今歲建武以兵變報一時渠魁倡亂羣醜恣兇脫巾
鼓譟操刃橫行或辱詒軍門或傷及主帥司府任其
騷擾城市被其焚掠真不知朝廷紀綱名分爲何物
者而所損國威良非渺小臣以爲此皆當事撫臣之
咎也蓋方其未變也貴妨其漸借日起於月糧加削
也士卒驕縱也總兵貪暴也則撫臣彈壓之謂何及
其旣變也當正其罪若曰姑爲犒以牛酒也約以盟
誓也苟且了事也則撫臣紀律之謂何誠知其無以
自解矣臣乞我皇上勅下該部以後遇有撫臣員

缺必慎加推選務才德兼全文武並用者始授是任
庶地方有賴而黷孽不萌三曰糾正章奏以尊體統
夫所謂章奏者人臣告君之言也知而不言與言有
不盡者固非也言而詭異與言無忌憚者尤非也蓋
以卑承尊其道則然耳臣待罪該科看詳章奏讀犯
顏極諫之疏詞嚴義正不避忌諱此其忠憤激烈出
於愛君之心每用嘆服無庸議也乃有一二者不諳
臣禮肆逞胸臆或摘事以中人或飭情而反詆競爲
詈罵之態且多褻嫚之語士人傳誦有竊笑者有駭

異者此豈可施於君父之前者哉塵穢聖聰莫此爲甚而同寅協恭之義亦屬有乖此而不糾正之則其流之弊將有不知所終者雖 皇上天寬地厚大賜包荒如朝廷之體統何乞我 皇上特旨申諭諸臣俾悛前非共成和衷之美如仍肆言無忌者許臣等叅治以爲躁妄之戒斯敷奏之體可釐而尊卑之分以明矣四曰溥議賑濟以蘇困窮臣聞方春陽氣開發導養萬物古天子迎春東郊布德施惠下及兆民兆民熙熙如享大年而登春臺此太平極治氣象也

漢文帝嘗詔曰方春時和草木羣生有以自樂而吾百姓莫之省憂其議所以賑貸之今昔傳之以爲美譚我皇上德備仁詰治隆唐虞視漢文遠甚茲允科臣言軫念楚地荒歉且蠲且賑海寓仰德矣臣因念去歲各省災異連牘奏聞殆至今春青黃不繼黎氓枵腹菜食不厭餓殍載途省省有之奚獨一楚之可慮已耶臣乞皇上一視同仁降勅該部行各撫按官大施賑恤或一歲偶歉則量動倉穀以濟民饑其或積歲累歉倉穀已盡則多方設處務遂生全不

得坐視嗷嗷傷和逆理以負朝廷惠養元元至意再
照往年法令操切每以積穀分數別人賢否而郡吏
日就束縛不敢言賑卽年遭大疫戶口凋殘止放易
新穀數石令其抵斗還倉民又畏其追償不樂於借
則寧襁負流移就食他方婦棄其夫子棄其父展轉
溝壑何可勝數臣切憫焉乃願勅部併行各省除地
方凶荒異常百姓朝不謀夕者則宜亟議開倉放賑
不得一槩行易新之法使在在皆霑實惠斯窮簷得
所而部屋生春矣語曰和氣致祥乖氣致戾凡此四

者順之則和氣生矣逆之則乖氣應矣方今旱魃爲
災雨雪愆期雖其所由致者或不止此而亦未必不
由於此也伏惟 聖明採納施行則庶乎人心胥悅
天意允孚而謂雨暘不時若者 臣未之信矣不此之
圖而但從事於祝告之文豈 臣愚所願於君父者哉
臣于冒宸嚴曷勝悚慄祈禱之至

感時修省竭瀝忠忱敷陳政務切要以備聖明
採擇疏

王

銓南京戶部主事
萬曆十三年三月

臣聞賈誼爲梁太傅而上治安疏范仲淹知開封府
而上百官圖彼皆非有言責也顧其心在國家見有
跋扈紕繆而心不能忘於是思爲補偏救弊之策以
善其後所以危言激論雖觸忌而不顧也況今當修
省之時正陳見誠愀之日前疏冒昧欲望我皇上
及百官交儆以弭變矣然國家之事其大者則人材

邪正所關政事得失所繫生民休戚所由也於此敝而不修偏而不舉則日以寢壞將至於極弊而後已

臣觸目激衷久矣今時可言而不盡言則不惟上負

聖明而亦下負臣心質之賈誼范仲淹豈能無愧哉

是以晝夜忖度謹條切要六事仰塵睿覽如蒙 皇

上惠察勅下該部酌議卽付施行臣不勝激切願望

之至一曰育賢才臣惟我國家建學造士教以人倫

課以經術欲儲賢才以備任使法至善也列朝得人

由此爲盛奈何敝壞至今臣竊祖宗之良法蕩然無存

而士習日非所當亟挽者此矣何以言之初國子監
生徒惟擇職官子弟民間俊秀及科貢之士蔭叙之
子而今也納例既開商販市井之徒皆得濫入由是
育賢之地爲貿易之所矣所以人不可教監規盡弛
升散惟循故事講誦悉應虛文及其聽選始旣以財
入官終必以官取償國家之利無幾而百姓受禍不
少也豈謂太學無關於賢士而錢穀可取之學官耶
府州縣學其初爲師長者責以教訓撫善懲惡而今
也陞計儀贊耳矣爲提調者責以考較獎勤警惰而

今也皆務因循耳矣生徒但攻文義咀嚼華腴曾不
聞明經用世爲何也懷才抱道爲何也一獵科名棄
其藝如筌蹄由是以吏爲師以律爲治罔知理道之
要矣昔章皇帝嘗語學士楊溥曰民生之休戚係庶
官之賢否何術可盡得其人溥對以嚴薦舉精考課
章皇帝曰此非探本之論也若不素教預養則人才
已壞譬猶濁其源而求其流之清胡可得也今當重
學校選師儒以責成之我皇上御極之初首乞祭
酒孫應鰲奏罷納監事例天下皆仰望矣奈何戶工

二部旋復開請是但計目前之小利罔恤教化之大
原甚太謬也臣乞自今宜如弘治間例嚴塞此途永
不許開雖國用偶乏從長別處仍倣前祭酒章懋奏
行選貢之法令提學憲臣考選廩增附生員務求行
著鄉間學通經術年富力強三試優等者乃以充貢
通計天下約取五六百人照依地方遠近分送南北
兩監初年首行一次以後或三年或五年著爲定例
由是申飭監規計日通經積分出仕迨歲大比選擇
學行俱優者方准應試革去卷面字號令內簾不拘

額數合式者取之則所養皆俊才而他日可稱任使
此非太學育賢之先務耶府州縣學臣乞宜如成化
間例置簿考驗其德行優文藝贍治事長者列上等
簿或德行優而經義劣或經義贍而治事短者列二
等簿或經義治事優長而德行缺者列三等簿歲課
月考循序而陞非上等者不許科貢此非磨礪人才
之要法耶抑師儒之職教化攸繫今天下教職或言
語文章不堪師範或昏耄不堪表率或庸鄙不堪風
化臣乞宜如前御史胡璘疏今後多取付榜舉人選

充敎職仍會試二次則人人樂就而師儒得人矣正
統時孫鼎爲松江府學敎授朝廷察知其賢遂擢提
學御史我皇上誠選敎職之賢者優擢一二則庶
官激勵於學政大有裨也昔尚書霍韜曰令出而人
從之速者莫若督學憲臣故督學者好文藝則士皆
縉辭也好實行則士皆反躬也督學憲臣可輕委非
其人哉乞擇操行端方學職醇正者任之而責其績
效不專於校文考藝之末務使士子回心向道明倫
修行預養經濟之具斯不負朝廷育材至意伏乞勅

下吏禮二部通將

臣

言酌議如有可採更望

皇上

斷意行之始終如一則天下人文幸甚

臣

愚不勝慙

惓二曰慎任使

臣

聞全材難得自古記之唐虞之際

得人盛矣然禹以治水稱使其稼穡未必如稷也皋

陶以明刑稱使其典樂未必如夔也契以善教稱使

其治水未必如禹也堯舜惟善使之所以庶積其疑

耳今之人材也可責以兼能哉故長於理財者使司

錢穀長於刑名者使以治獄長於軍旅者使以治兵

長於政事者使以拊民有風節者使居臺諫有智畧

者使任邊疆有器識者使居師儒有道德者使任公卿審如事而天下之政畢理矣然卒莫之能行何哉臣思其故有三其一眩名實昔唐太宗曰有功則賞有罪則刑誰敢不盡職今人心不古毀譽失真本柔媚而以爲謙厚本正直而以爲驕抗本苛細而以爲精明本寬大而以爲軟懦是以賢否易淆銓衡難察廣交延譽恒獵乎清華孤介特立每見其淪落奔競者得進則忠賢退矣僥倖者苟多則邪枉用矣名實之爽治亂之關也可不謹哉其二徇私昵往者當軸

大臣無不援引親黨厚其故舊甚則借爵賞以酬私恩假公罰以報私怨酬私恩雖惡必容報私怨雖賢必黜而媚寵之臣又希意以迎合由是官反以私昵庸矣今公卿多賢此風旣殄然將來宜防也羊祜曰人臣樹私則背公當軸大臣宜知此義矣其三拘資格昔高皇帝謂吏部曰朝廷懸爵祿以待士資格者爲庸流設耳若有賢才當不次用之臣查列朝用人不盡拘例如胡儼由知縣任侍讀李時勉由主事任祭酒孫鼎以教授擢提學御史韓雍以御史擢僉

都羅通以兵部郎中擢副都御史蕭暄以布政陞禮部尚書李賢薛瑄楊一清張孚敬桂萼方獻夫皆不出翰林而得辦事內閣今也資格太拘非翰林不得叅預密勿非科道不得驟躡京堂吏部視禮部異矣禮部又視他部異矣凡司屬遷轉惟論資地不量才賢中外百司一切限年躡級次若魚貫是使循資而進者有必得之望無兢勉之心故厭遲滯而慕速化者窺伺觀望爭趨於華要之途宋人有之賢才伏於下者資格礙之也職業廢於上者資格率之也故用

資格以處常流可矣果有才德邁衆者宜不次擢用
科道部屬簡其賢則旌別之不必以資地拘則人孰
不爭自淬勵以修職不然纍資以取貴積考以遷官
將使賢者奚勸不肖者奚顧忌也伏乞勅下吏部虛
心酌議名實易眩何以覈之私昵易徇何以正之以
身率先秉公持衡毋偏毋撓可也於資格所當變通
者悉查弘治事例一一叅酌開請而行由是任使當
而治安可圖矣臣愚不勝惓惓三曰覈實政臣聞民
猶子也君猶父母也羣臣百官猶父母之所任以分

理庶務教養其子者也故爲臧獲而情則家長必怒而斥令之爲人臣而不實心在事使朝廷德意不宜膏澤不下將焉用彼爲哉臣伏覩皇上加意民隱飭羣吏除弊端屢有明旨宜中外臣工儆心惕慮實意奉行也然而百官應承於下卒鮮實政何耶由相沿積習未盡矯正故也積習有二朝廷之上議論多而紛更驟則法守難定吏部之黜陟撫按之舉劾採名不採實則僥倖易生何以言之如近日建言者多矣然使建言者切當覆議者確慎一經題覆堅意持

焉則上有責成下有法守然後察百官果實奉行否也而據以殿最之誰敢不肅哉今學不通方掇拾見聞而漫爲指陳者有之偶見一隙懲噎廢食而輕議變法者有之部臣明知不可遷就與覆始旣弗當終則難持是以部劄屢行於外天下諸臣皆曰此不久欲變者也是何怪其玩揭視之也持議無恒上無以示信下何以共令臣故曰議論多而紛更驟宜矯正也賞罰用舍者人主所以勵世磨鈍也賞當功則賢者益奮罰當罪則不肖者始懲而吏部之黜陟撫按

之舉劾寔司其事不可不一求當也臣歷任中外
有年矣竊見仕外者巧飾文移善爲承趨則上官悅
謹事過客曲徇人情則聲譽揚而勉力拊循勞心撫
字者薦疏未必及也吏部未必知也仕內者納交要
譽攀援依附則爵驟崇露才銜能便給辨捷則名益
高而正直不阿重厚少文者知之必寡也用之必後
也夫隨世以就功名者必非賢士忠貞持立之操必
不苟同於流俗若使隨世者什九通顯而特立者什
一遇知士趨安得不日卑哉由是以當官任事爲拙

以虛聲速化爲能無惑乎實政不修而民不被澤臣
故曰採名不採實宜矯正也伏願朝廷之上省議論
慎紛更一法之立堅如金石一令之布信如四時然
後耳目定而心志一下知法守矣再乞勅下吏部都
察院通行各省撫按查訪賢否毋徇虛聲外任藩臬
以下州縣以上必以誠心任事潔已愛民職修績懋
者爲賢而善趨承飾文具者必注下考內任卿貳以
下司屬以上必以誠心體國正己礪行職修望重者
爲賢而獵聲譽藉勢援者必置劣處如此而臣職不

修實政不著者未遑有也堙愚不勝惓惓四曰擇要
職古今稱知人善任使者必曰堯舜然堯舜之智而
不徧物其先慎者要職也如欲百工時叙則擇百揆
欲十二牧修政則擇四岳欲六府三事允治則擇九
官是何也蓋宅百揆者得人則代君而擇百執事彼
爲之矣總四岳者得人則代君而擇十二牧彼爲之
矣居九官者得人則代君而治六府三事彼爲之矣
此之爲善用其智而功成萬世稱聖神者必歸焉今
我皇上總攬乾剛任賢圖治宜以堯舜擇其要職

者慎之今內閣輔臣叅贊密勿卽古公孤之選職最
要也先儒曰相道得而萬國理可不謹耶我國家竝
列九卿職任均重而吏部都察院尤重何者吏部進
退人材治亂攸關也都察院糾察百僚風紀攸繫也
次則科道寄耳目察邪正辨是非非要職耶次則翰
林院儲英雋備輔導資啓沃非要職耶次則撫按憲
臣振肅吏治彈壓一方別淑慝糾奸欺誠要職也次
則祭酒提學臣師表多士教育人材明經術闡道化
誠要職也以上要職諸臣伏願皇上或疏御屏或

登手冊記其姓名察其賢否如職修而賢果著則優
禮超擢之或職隳而不肖已彰則詰責之顯黜之遇
有缺出必會官推舉而審求至當誠使致謹於未用
之先則必不誤於既用之後此謂勞於求賢逸於得
人堯舜所以治唐虞者用此術也然科道之選撫按
之差臣猶有議焉往者取選科道正直通達者非無
其人而或以援引或以延譽如此得之者恒多也既
選之後抗直敢言者必忤時而退委曲保位者多獵
等以遷此正氣沮抑而趨時益衆也言路何由而清

公道何由而明臣乞自今伊始推官知縣取其有實
政者行人中書等官取其有實行者仍望勅諭吏部
都察院多方會訪務協輿論一擇心術光明二擇通
達政體三擇剛正質直而虛名浮誇巧鑽善刺者特
裁抑之則旣擇之精矣尤望皇上優容正直培養
士氣使言責得盡其忠裨益良不小也撫按憲臣監
臨一方其權重威行賢固易行其志不肖者亦易濟
其私臣嘗聞陳瑞巡撫湖廣厚歛資財以媚權奸及
總制兩廣公然遣人下海取珠纒紉蓋之當時未有

以其事聞於皇上也朱璉巡按湖廣搜括一省庫藏殆盡半潤張氏半充私囊侍郎丘橈疏云儼然享王侯之富者蓋指朱璉也劉維巡按雲南狎一門子強令提學道送與之納監兩司唯唯而從諛之猶爲有紀法乎此二臣者縉紳醜之當時未有以其事聞於皇上也夫撫按持風紀以糾百僚而自壞若此何怪乎吏治之日敝也所以然者由其權得自恣而又無人議其後耳今回道考察祇應虛文如朱璉劉維未聞都察院考其不職也伏乞勅諭兩京科道嚴

加體訪不時叅劾然後撫按慎而持廉秉公則一省
之臣莫敢肆於民上矣臣愚不勝惓惓五曰重守令
臣聞民生之休戚在守令故一則曰民之父母謂其
撫而字之也一則曰民之師帥謂其治而教之也今
之守令其最稱能者不過曰善督租善治獄善簿書
期會而已問其所撫字者何術問其所教化者何道
槩乎未之聞也此非守令之過由撫按司道督責之
者止於數端而已即有賢者出焉志慕古之循良必
不屑於流俗必將攻茲爲之然士之人不以爲怪則

以爲迂矣猶能一日安於民上哉是何也始道不明而俗見膠固也嘗觀守令之俗見有二急名譽也結上知也急名則銜奇以譁衆結知則阿徇以取悅有此二臣而閭閻之疾苦奚暇顧哉撫按司道之俗見有三好攬權也好變法也好尊已也攬權則侵下職變法則亂舊章尊已則善趨承有此三念而閭閻之疾苦亦奚暇顧哉書曰臨下以簡御衆以寬此帝王致治之上術而今之仕者則以更章刻核爲能以惛惛安靜爲鈍誦其條議則善覽其文移則精察之閭

閭閻則分毫無補矣臣見一與備道議設捕盜官鄉民
驚駭百計營脫比承委縣丞知民恐懼多方取索盈
囊而歸又見一府條建義倉富民不敢承役縣官勒
法行之讐扳告訐四境騷然其始也惟以結上知未
嘗計民利便其既也名譽已得亦不顧法行與否是
何異於烹鮮而攬之治絲而棼之耶蓋乎莊周曰治
天下亦奚以異牧馬者哉去其害馬者而已今撫按
條約誇多競藻愈出愈奇其實土俗未必盡宜事體
未必盡當多使計令掣肘而難行昔御史李弼疏請

禁革已奉臣聖旨而猶不正臣竊謂條約宜革矣乞

將憲綱一書再加斟酌時宜頒行可耳 高皇帝起

自閭閻知民疾苦立法何有不善所以敝者行之不

得人耳今撫按在外輒取 高皇帝約束而紛更之

如一條鞭法不知其何昉始而浙江行矣繼而江西

而山東而湖廣無不行矣其初一人博有聲譽羣起

而倣焉不問疆域異齊也民生異俗也亦不顧法之

終久可行否也委官會議急於刊布及前官之議未

成後官紛更又至民奈何不擾且敝也臣竊謂紛更

宜禁矣守巡道監臨一方惟以察官吏糾奸弊鎮境
土其責也而今則一小訟盡以准理守令佐貳終日
爲上官剖訟追贖遞文書候稟謁而何暇問民疾苦
與之拊循也臣竊謂上司准理宜省謁見宜省矣臣

嘗譬喻雖有騏驥左縱右控必不能善其走也雖有
扁鵲主人執方而限以藥品必不能濟於醫也今撫
按束縛令守太甚非其所議非其所允則不敢行雖
上之令不便於民莫敢違拂先之撫按旣如此後之
撫按又如彼守令東支西吾徒苟且以應責曹趙克

國曰請毋拘臣以文法使得便宜行事今盡拘以文法也何以望之察夙弊審利害得行便宜以佐百姓哉間欲有爲或不便於豪家遂將徵於上令駕詞薦越以抗長吏此風豈少耶其在中材但知承順上司以要荐剡待美遷徒使賢者咨嗟抑鬱不得行其志此爲平治之害豈小小哉伏乞 皇上勅諭撫按司道各守職掌毋侵下職各遵舊章毋喜紛更各務息民毋繁批理各省禮文毋多稟謁府州縣事悉委守令而不以牽制惟察其賢否糾其奸弊守令宜破俗

見各修實政必養道備教道行使民安於田里而風
移俗易然後稱賢區區簿書之末不足語政也方今
水旱頻仍饑饉薦臻海內民困甚矣非盡得賢守令
去煩除苛輕徭薄歛與民休養則瘵日甚臣慮其所
終也伏願 皇上留意焉臣愚不勝惓惓六曰明學
術竊惟學術者士人所由適於道國家所由適於治
之路也今之人材不古治事多舛何耶總之學術不
明未悟義理之正是以蔽於氣習之偏狹於意見之
小大則踰閑越矩小則過中失正矣昔 高皇帝謂

侍郎曾魯曰堯舜授受其要在允執厥中後之儒者
講不精及見諸行事往往背馳魯對曰堯舜以此道
宰制萬事如執權衡物之長短輕重皆得其當後世
鮮能此道欲求一一至當難矣

臣觀

高皇帝君臣

問對之間無非講明學術使世儒皆知執中爲宰制
萬事之權衡也何今世之學雜操而叛道者衆哉其
在富貴利達之徒齷齪突梯依阿渙沁固無足齒有
學爲詞章者矣殫精研神競葩藻而拂經有學爲清
談者矣好玄尚虛賤名檢而惑俗有學爲和同者矣

毀方瓦合務周旋以媚世有學爲權術者矣深情厚
貌匿欲以售奸有學爲廉隅者矣矯飭風稜虛張而
鮮實有學爲才辨者矣矜奇衒異弔詭以市譽嗟夫
士風士習若此縱皇上欲盡得真才以布列有位
將安取資哉宋儒楊時曰學者須是聞聖賢之道若
但博通古今爲文章忠信愿慤不爲非義而已則古
來如此等人不少然以此爲聞道未可也學而不聞
道猶不學耳何者士惟聞道則存諸心者滿腔皆天
理指諸事者觸處皆正道居家則爲孝事君則爲忠

臨民則仁授之以政則無所施而不當功名富貴不
爲之動毀譽得喪不爲之挫死生利害不爲之奪古
之人臣皐夔稷契伊傅周召其選也學術明則天下
未必無皐夔稷契之徒學術不明則天下必多富貴
利達之士彼富貴利達者以爲身爲家則重而爲朝
廷則輕也我皇上亦何利于此輩而不亟以挽之
哉臣願皇上崇重道之臣獎嘉仁義之士以樹風
聲於天下仍乞勅下吏禮二部宣布中外自今以後
朝廷用人必先德望而後才品學校掄材必先德行

而後文藝使天下士皆由濂洛遺訓以邇求堯舜精
一之傳孔孟仁義之旨而踐修於五典三物之教蘊
之爲德行發之爲事業一以貫之然後爲聞道然後
爲正學久而化行將見直儒輩出道學大明而佐我
皇上雍熙隆古之治不患無人矣臣愚不勝惓惓

敬祖畏天亟圖修省疏

劉曰梧

浙江道監察御史
萬曆二十二年

臣聞天道甚邇變不虛生人君有失道之徵天必出異災以儆告之初或見于山川物象已乃及于城廓宮闕至于陵寢摧損神居震動幽明惶怖中外傳駭則天之怒彌甚君之失道彌彰此豈可泄泄然姑托恐懼之貌言襲修省之故事可以回天意妥神靈而已乎頃覩鳳陽守備太監吳忠一本爲異常風雨摧損陵殿等事奉 聖旨覽奏 皇陵殿廡等處爲風

雨雷雹摧損數多上驚在天聖靈朕心惕然震懼痛
自修省宜先行奉慰禮着禮部擇日具儀來工部便
行該撫按官踏勘工程作速修理欽此夫此一變也
鳳陽撫臣李三才先期已奏報矣已而內臣之報繼
至而後奉有修省之旨豈其前此未經聖覽乎抑亦
疑撫臣之誕而莫之信乎夫變切祖陵臣民悚然動
色皇上乍聞之始漠然不一怵戒似于皇上敬
祖畏天之心猶未盡真也不信撫臣而且信內臣不
批答兼顛蹶兩撫獨於後牘于皇上敬祖畏天

之心猶未盡誠也及今時時切氷兢之懷事事求修
省之實尚屬後時不然而惕畏以口不以心修省以
文不以政陳詞奉慰第取具儀葺圯支傾第飾廟貌
恐方蹶方渝之心不可以若是其幾也何也天之仁
愛 皇上甚矣 皇上之狎侮天戒亦屢矣 祖宗
之期望 皇上亟矣 皇上之愆忘祖訓亦多矣水
旱妖氛旣委爲天行之數山崩川竭又視爲偶然之
災兩宮煨燼非不勤省躬之告然所稱實省改者何
在且不免藉爲聚斂之資三殿繼災非不下罪已之

詔然所稱實釐正者何事况伏益之以水火之虐郊
廟罕肅雍之節而對越昊天駿奔祖考之實意憑何
昭格章疏多寢閣之虞則代天撫世法祖弘化之實
政從此隳窳大臣天所簡也 祖宗之所敬也堂陛

隔而心志不聯宸座之側希聞召對部院之設半屬
虛位盖昔猶隆其體貌而今則并其體貌而畧之矣
百職天之工也 祖宗之所遺也猜疑設而手足遂
棄員缺數遷百不一補差遣病假槩不批發盖昔猶
縻之爵祿而今則不復太馬畱之矣億兆蒼黎天之

赤子也。祖宗之所愛也。自礦稅之說行而繪弋亂
于上。剝膚吸髓。既已盡奪其生命。而傳翼布爪。復縱
搏噬于虎狼。賞慶刑威。天命天討也。賞不僭刑。不濫
祖宗之所以公勸懲也。惟奸惡拂人之性。而司寇無
可守之法。孤忠獨善。旣無辜錯趾于桁楊。而逆璫巨
奸。意得漏網于國憲。况乎別館離宮。塗膏爨血。快心
于宴遊之具。寧問帑匱庾空。輦載捆輸。如流若水。動
色于黃白之來。豈恤天怒民怨。諸如此類。難以枚舉。
不審上天能無厭棄之否。祖宗能無怨恫之否。蓋

皇上自恃智術可以籠蓋一世福力可以絜齊高天
威命靈爽可以制馭海宇四夷舉天下事既無足爲
難卽舉天下之奇妖異青天災地變又何足爲動故
拂天戒悖祖訓自言而自食之弗恤而又遑恤乎人
之言臣始不暇多引卽如礦稅曾有朕心仁愛自有
停止之旨矣何其宜停止而久不停也熱審有減等
擬審發落之旨矣何其旋布而旋格也故臣謂皇
上敬祖畏天未盡真未盡誠者以此自非然者兩
宮三殿之災可謂烈矣胡未幾而有太廟槐樹之雷

火未幾而再有孝陵山頂之煨燼又未幾而復有今
茲異常風雷至于陵寢震動摧裂逾變而逾甚若此
也昔人謂宋有靖康之禍三不足實基之爲天變不
足畏祖宗法不足守人言不足恤耳夫畏天無形
而其守祖宗法恤人言與否則天下盡耳而目之矣
而况天視天聽于赫在上九廟神靈質之在旁乎萬
一皇天弗保祖眷忽替大難橫起四海鼎沸已怨已
離之人心不可復收拾斯時而閉城門開言路亦已
晚矣伏乞皇上深惟天心之仁愛不可常玩祖

宗之德澤不可常恃臣工之忠盡不可終棄幡然悔
悟惕然易慮與天下更始勿假貌言而鮮克已之實
心勿事虛文而憚改絃之實政亟親郊廟盡發章疏
敬大臣而亦曲體羣臣之私罷橫徵而并除暴橫之
使出纍囚以舒怨氣罷土木以寬民力詔旨必信宮
府一體使內外大小血脉流貫則怨聲變爲頌聲戾
氣蒸爲和氣如是而天變不可回臣請其受妄言之
罪蓋天之道不越于法度人情而舍守祖法納讜言
之外亦無復事天之道詩曰無念爾祖率修厥德又

曰畏天之威于時保之此今日修省第一事也臣待
罪言官因變陳言事關職掌輒不識忌諱冒干天威
伏希 聖明怜其狂愚俯賜采納施行臣無任戰慄
懇祈待 命之至

謹天戒憫人窮以保治安疏

馮琦

禮部侍郎

萬曆二十二年

臣等竊見九月中太白太陰同見于午又聞狄道山崩成坑更于平地湧出大小山五座大陰經天太白晝見相近相犯已爲極異廼至山陷成谷地湧成山則自開闢以來惟唐垂拱中有之而今再見也臣等欲有陳說懼涉煩瀆顧身爲九列同國休戚安有災變若此而恬不動心心知其危而不以告君父者竊聞帝天之命主于民心民安則天示禎祥民不安則

天垂譴告欲承天意當順人情近來天下賦稅之額
比二十年以前十增其四天下殷實之戶比二十年
以前十減其五東征西討蕭然苦兵自礦使出而百
姓之苦更甚于兵稅使出而百姓之苦更甚于礦加
以水旱蝗災流離載道畿輔近地夥盜公行至殺職
官家屬十餘人而地方官不以盜聞臣等以爲此非
細故也 皇上憫念小民不忍加派德意甚盛臣等
豈不仰體第奉差諸使各圖其私跟隨奸徒動以千
百 皇上欲通商而彼專欲困商 皇上欲愛民而

彼專欲害民。曰：皇上戒以弗信，撥置而撥置愈多。皇上責以不許騷擾，而騷擾愈甚。皇上之心，但欲裕國，不欲病民。羣小之心，必先瘠民，方能肥己。蓋近日有神奸二種：其一專務窺探上意，具有成奏，假武弁之手，以上之；其一專務剗害小民，畫有成謀，假中官之手，以行之。運謀如鬼蜮，取財盡錙銖，遠近同嗟。貧富交困，貧者家無宿儲，止憑營運，但奪其數錢之利，已扼其一日之喉；至于富民，更被傾害，誣以漏報國稅，誣以盜賣礦砂，誣以私販官鹽，誣以偷藏禁木。

粧成局面聲勢赫然及其得財寂然無事需求不遂
立見傾家無地可容有天難訴利歸羣小怨歸朝廷
假令民間不窮而怨民力猶堪不怨而窮民心猶固
今以剝骨之窮抱傷心之怨一呼易動一動難安今
日猶是承平民已洶洶不定一有風塵之警誰能爲
可保者夫哮拜誅關白死此皆用人丁以爲兵用民
財以爲餉若一處小民唱亂各處小民應之于何取
兵于何取餉乎 皇上聖神洞知今古自秦漢以來
天下危亂之由惟有四字曰人人嗟怨而已嗟不敢

言其遠。皇上試差親信忠實之人訪問都城內外里巷歌謠令一一具實陳奏則民之怨苦居然可覩天心仁愛明示咎徵誠欲皇上翻然改悟坐弭禍亂迺禮部修省之章未蒙批發而奸民搜括之奏又見先行卽如何其賢遍解天下無碍官銀一節各處錢糧皆有定額所謂無碍云者不過支剩羨餘近日征調太頻徵求太急正額錢糧尚多拖欠羨餘支剩何處得之此令一下急如星火不但指有碍爲無碍亦將指無銀爲有銀必將正項公銀半充進獻公用

無措又派民間庫藏既空間闕亦敝有司一有爭執輒謂阻撓身且不保何有于官官且不安何有于民竊謂天下之財宜散置天下譬如一身榮衛當流布一身若盡括肢體之血置之心腹之間四肢既已空虛心腹亦將脹滿又如仇世亨奏徐鼎掘墳一節事之有無誠難懸斷然以理論之豈有一墓而有黃金巨萬之理即使有之亦當先下撫按覈勘虛實分別首從先正其掘墳之罪而後以掘墓之物入官未有罪狀未明而先沒入貲財者也片紙朝入嚴旨夕傳

卽有深冤誰敢辯理不但破此諸族又將扳及多人
但有株連立見夷滅輦轂之下尚須三覆萬里之外
止撓單詞遂令狡猾至賤之流操此生殺至重之柄
此風一唱誰不效尤何地不可爲金穴何人不可爲
撲滿已同告緡之令又間告密之端臣等方欲陳奏
而某某之奏又得旨矣五日之內搜取天下公私金
銀已二百萬傾府庫之藏豈無盡日窮天地之產寧
有足時奸内生奸例外創例臣等前日猶望其日減
今日乃更患其日增不至民窮財盡釀成大亂必不

肯止伏望皇主穆然深思超然遠覽上天可畏小
民可憐亟與廷臣共圖修弭杜中臣攘奪之路絕羣
小窺伺之萌無令四海蒼生之衆結怨清朝無令千
秋青史之編貽累聖德臣等有心恤緯無力回天所
望者九廟之神靈所恃者九重之英斷耳不勝懇切
仰祈之至

夫災重見乞加修省以預凶敗疏

劉

綱

翰林院庶吉士
萬曆二十五年七月

臣以介草茅誤蒙拔擢久儲玉堂之署竊自幸遭
時遇 主庶幾扳拊景運以罄生平乃通籍至今則
有大謬不然者伏見兩年之間祝融爲災近日災異
曠古希聞夫天垂象變不虛生卽今玄穹震怒有如
灰燼光景可畏痛自祓濯領冰集木惟此時咨諏善
道以濟燃眉惟此時分別雅正輔理國事亦惟此時
去歲 兩宮罹災 皇上當時驚懼不遑大小臣工

莫不讚嘆以爲人主善承上天仁愛之心可保永無
災害俄而漸成故事積習爲常卽布詔天下畧無禹
湯罪已之誠文景蠲恤之惠使者冠蓋相望徒貽驛
遞騷勞臣于此時已知天心之未厭矣比者大工肇
興愁苦萬姓採木伐石征稅運磚遠者萬里近者數
百里百姓竭膏血不足供其費絕筋骨不足任其勞
賣妻鬻子不能償其貸父離子散不能畢其功加以
旱魃爲殃野無青草人人敢怨在在如仇而天不悔
禍門殿回祿聖母驚疑人心危懼五行志曰君不

恩道厥後燒宮（皇上試自猛省晝之所爲夜之所
息思在道乎不在道乎凡敬天法祖親賢遠奸寡
慾保身輕財重命俱謂之道反是者不名爲道道之
有無天之所緣而禍福之也皇上臨御之初勵精
圖治萬機得其理百官得其職皇天佑之未嘗有
災比年以來簡禋祀罷朝講棄肱股閔耳目斷地脉
忽天象君臣有數載之隔堂陛若萬里之遙不知
皇上深居靜攝所爲祈天永命者何狀外庭之人卽
有知有不知天不見耶夫皇上之天下祖宗之天

下也 祖宗朝遇震雷則曰 陛下赦臣臣赦天下
故即大赦蠲租務臻實效三殿災則恐懼不安詔求
直言故遣官四出安撫軍民俱非驚惕目前爲彌文
而已也 皇上身承祖業運撫盈成春秋鼎盛麟趾
振振天之所以厚之者至矣而所以承天者無以當
其心今日之災其災以類天若曰 天子所以代天
理物勤恤民隱而不爲已私者也皇之不極于誰會
歸何以門爲朝儀久曠于誰稟仰何以殿爲元宰素
餐有汚內閣何以房爲其所以示儆戒勵更新者不

遺餘力矣此時此景見者痛心聞者酸鼻尚可如前
玩愒以重怒上帝哉臣聞五行之性忌積利暢木
暢則榮水暢則長金暢則流土暢則平火暢則順暢
不爲災積者災之伏也其出必烈目今之災極矣臣
仰體聖明修省至意屬焦頭爛額之時敢冒死而
言積之狀可爲流涕者七今皇長子冠婚冊立稽
祖訓正其時矣而尚未舉行是曰積典大僚以職事
請言官以應行請而強半不報是曰積牘外之司府
要缺久懸視事者有越俎代庖之嫌待治者有五月

京兆之議是曰積缺向之罪斥諸臣一槩不錄以一
累百原多池魚之殃以終窮年致有投珠之歟是曰
積才閫外有揚帆之醜而當事匪人中原有揭竿之
徒而金革未息是曰積寇鎮邊督河諸臣觀望風指
以無爲有輾轉相冒虛詞罔上恬不爲驚是曰積玩
諸所爲積皇上不能以明斷決志臯不能以去就
爭然天應隨之毫髮不爽往年三月初九日災今年
六月十九日火是積三爲六積六爲九也往年災
乾清坤寧宮於年災口皇極諸殿是積兩爲數積五

爲多。天心稔駕未可易測。改心易慮尙足挽回。易曰亢龍有悔。亢則無下資之實。故有位而無位。有民而無民。積至亢極造物制之。鮮不敗矣。故積羽沉舟。羣輕折軸。多蓄迅發多藏厚亡。可不寒心哉。皇上何不體上天懇切之愛。思挽回渝怒之術。卽無大廷可泣而卽召九卿科道諸臣于便殿面議得失。見兎顧犬未爲晚也。若必喜其將順。處堂相安如元輔趙志臯者。小之輕政事而羞士類。大之叢民怨而甚天怒。祇令廟堂之上。林泉之間。豈無奉公憂國謀

斷相資表脫塵埃出志皐數倍之上者 皇上非不
知之徒以志皐便于指使惟言莫違欲用人而不用
于人耳第天下大計主持在人君燮調元化領袖在
首相關係至匪輕矣英雄豪傑扼腕裂眦不得效尺
寸于主上乃以嗜利匪人爲荐紳表率此志士之望
聞而嗟傳聲而嘆焉者耳此一臣者科道露章相談
而畧無赧色遠近切齒相譏而哀如充耳久爲蒲柳
姿而干澤之願愈深已是朝暮人而登壘之志未歇
古者災異策免三公而彼闔然媚世居之不疑有功

則受其實有難不與其憂夫首揆豈養病之地多事
非杜門之時床褥非拜恩之所衰庸匪專席之任此
時此人恐不可令闕白諸酋聞也堂堂天朝詎乏
名流而猥以智昏唇腐之夫長處明天子下天下
謂陛下爲何如主耶臣西南賤品居無德隣非不
知于志臯奉命承教可幸無罪顧惟國家清寧則
臣子甘受其福倘積玩爲災積災爲變臣之死所不
可上安望其他矧自掄校以來此身業已許之君
父其又何愛焉邇來狡倭大舉謀出萬全中外洶洶

人心思亂更聞異常災變益啓狼心過此其及圖之
乎漢臣有言災異者乃皇天所以譴告人君過失
猶嚴父之明戒畏懼敬改則禍消福降忽然簡易則
外罰不爽故動人以行不以言應天以實不以文悔
過莫先行政行政莫先用人今日急務孰有急于斥
鄙夫親君子以回天意者乎明良交泰之誼必面
議始真憂危懇惻之思非揭疏可盡陛下英明之
資可以爲禹湯文武可以越文景當思祖宗櫛風
沐雨之天下非可屑越之具皇天彰明急烈之譴

告非比尋常之事首罷志臯以爲人臣不職于和之
戒亟召公卿言官入對詢以回天之術必有抒平
日之積忠陳今日之急務以舒天明恐懼之懷將
見聖躬之血脉流通初終並美爲天之肖子而
祖宗之靈大慰矣

禁地火災頻發乞痛加修省疏

余繼登

禮部尚書

萬曆三十七年十二月

十二月二十七日尚寶寺等衙門被火一時焚毀無遺臣等不勝驚懼竊意我皇上敬畏事天必將遇災而惻然側身而修省以仰答仁愛乃伏候數日未見傳示豈以爲常事不足以動聖心與夫人君事天如子事父母父母之怒大而發聲小而徵色人子皆當敬慎以承之安有兩宮三殿之後天威猶震餘怒未回復此遺告而恬不爲意者以爲災異可懼也而

不知懼則靡可懼矣伏乞亟降明諭申飭大小臣工
同加修省庶可以收人心挽回天意望 皇施行則
上俯賜 宗社生靈不勝幸甚考之傳記火之神曰
鬱攸言火之不可鬱也火之鬱則必燃尤民之情不
可鬱也人情鬱則思亂 皇上積年累歲不接見羣
臣下之情欲達于上但憑章奏乃章奏又有時而不
發上之情欲通于下惟憑批答乃批答又有時而不
下卽 皇上聖神孰敢有擅留者然積久坐玩積玩
生奸萬一有煬灶之奸釀金匱之勢則君臣之情得

無有鬱而未暢者乎 皇上之罪曠也此不忍加派
小民之心豈忍貽累小民今無論供給之費奔走之
勞令民失其農業卽剋銀不出至于賣砂賣砂不已
至于包銀日復一日俾富者貧貧者死彼其貧苦無
聊之情欲仰訴于 皇上而不可得也得無有鬱而
未暢者乎有店則有貨有貨則有稅是 皇上欲稍
取之于窮商非欲取之于貧民也乃一官出而相隨
者至數百人此數百人者各相隨數十人奸民趨利
如蠅聚腥引類呼朋布滿宇內無一日而無抽稅之

人無一物而非可抽之稅卽今商賈不行百物騰貴
貧民無所覓食束手待斃當今水旱災傷之時何以
堪此彼小民不堪情狀欲仰訴于 皇上而不可得
也又無有鬱而未暢乎巡視者 天子所使拊循者
也巡按曰代巡所以代 天子巡行一方彈壓奸邪
肅清吏治者議及礦稅動被詰責此猶詰責而已至
于百姓所以安于田里而無嘆息愁苦之聲惟恃有
守令在一拂羣小民赴訴而不聽夫 皇上之威雷
霆也逮之繫之矣然逮不當其罪繫不服其心彼其

情得無有鬱而未暢者乎行取諸臣皆有功于地方
皇上以爲才而召之闕下者也乃以爲可用而召
之又不用而羈之諸臣疏請稽而不報彼旣無民社
之同又無官守之寄米珠薪桂進退誰咎卽人臣之
義遲速惟命而諒其一念効忠之忱得無有鬱而
未暢者乎夫匹婦含冤足動天意萬人所鬱不火而
然所以通其鬱者是在我皇上而已伏望憬然覺
悟銳然改圖于臣下章疏可行與否一一批發勿更
留中以滋衆人之疑於礦脉之細微者以漸封閉之

于稅貸之瑣屑者一切停免之于官民之不遵明
旨生事害人如打死平民打死生員者按法而誅之
假撫按以便宜之權勿輕損其體面待守令以付託
之重勿輕至于折權行取諸臣及時考選使各吐其
胸中之奇以其濟艱難之運則人心旣悅天意必
回有不轉禍爲福者臣等甘受欺罔之罪矣

遇災思懼直陳時政之缺懇乞聖明省覽以回

天心疏

魏允貞

巡撫山西都御史
萬曆二十八年正月

昔賈誼當漢文之世海內殷富時時詔減民田之半
刑罰幾措而不用而猶爲痛哭流涕長太息之論以
憂治而危明文帝不以爲忤而後世且謂誼通達國
體不目以爲迂與激使誼當今世而見火災連連三
四發又將何如也上無誼之才若識不能早見預待
言未至之憂姑卽臣自所見耳所聞其心切以治世

所無有而亂世所必由者陳于 皇上庶當消弭萬

一矣夫冊立大事冠婚大典業已斷自宸衷示以必

舉

臣知

皇上父子至情宗社遠計必有不俟警惕

而後喻乞請而後行者

臣

惓惓于新歲初樂與海內

臣民拭目以觀此盛典也若夫衮職有關大獎當革

舊樂之異致者

臣

安敢緘嘿以負 皇上今候考各

官皆科第出身試以中書行人推官知縣多者七八

年少者五六年撫按薦之科道訪之部院協同而品

第之

皇上猶然不輕與一職也彼魯坤馬堂陳增

高淮孫朝等試之何事舉之何人而儼然令專擅一方所譽立福所毀立禍殺人不論褫奪職官不問何其不以待官官者而待候考各官也科道諸臣少讀涉世習知名義風節爲重所言者皆國家利害邊計民情紀綱典制途耳嘗多遜志常少有遭譴斥有候旨不下彼報礦稅之流皆屢犯軍徒不齒鄉里不容有司規利避罪肥身潤家其言絕是妬國害民朝上夕允夕上朝允惟恐批發不逮奉行不力皇上何不聽奸民者而聽言官也衙皂吏胥持佐領官一

票一紙入村落問罪人追逋負猶然鄰里驚惶雞犬鳴吠攢錢打點惟恐不給彼金吾之使絡繹道路雷霆震動虎兕跳號下魂喪魄破家失色如吳寶秀華鈺等之慘矣 皇上何不一念及也錢糧出入原有經制堂屬相參前後交代一年查盤三年考察猶有不自愛而加羨耗通關節利欲薰心而禍弗旋踵不暇自計者彼礦稅二使握掌利權動踰數萬有司不敢問撫按不與聞自收自解任多任少豈其皆伯夷之清茹蘗飲水之夫而無一垂涎染指其間者

聖上何不一察及也兼金則取之渫矣不足不止也織造則取之吳若越若秦若晉矣不滿數不止也珠寶則取之海南粵矣不窮萬里不止也獨其用人則不然小臣無論已輔臣論道經邦燮理陰陽其責甚重其職業尤不容曠而屢格至使呻吟牀褥無益成敗者克焉 皇上何異于求金求珠玉之心也 皇上聰明天縱高于萬古豈其獨昧此五者孟子曰權然後知輕重度然後知長短物皆然心爲甚 皇上取重在此無怪乎其宜聽而不聽宜念而不念宜察

而不察也

臣

愚不知忌諱狂言至此非不爲身計與

親計也

皇上一悟則天心回民心固天下必有治

無亂

臣

一念爲

皇上保安宗社之心甚于爲

臣

父

維天下之心甚于爲

臣

身耳倘

臣

畏禍不言致

皇

上猶然不悟也則天人交去而禍幾至矣

臣

以不避

忌諱而僭言之至此伏惟清晏之際一省覽焉

臣

愚

幸甚天下幸甚

早圖修省以格天心疏

史學遷

雲南道監察御史
萬曆三十年

臣於本月初三日風聞黃河乾涸人情驚訝隨於是
夜接得邸報見陝西巡撫賈待問題爲災異非常自
陳不職事內稱本年閏二月二十八等日河州城北
四十里外河水細小不盈三尺又稱歸德河水盡乾
下流一渠查係莽刺沙溝朶刺木納四處河水流來
不係黃河之冰其黃河源頭已竭又稱火真諸酋盤
據河外乘機大犯勢屬可虞除預備外因自陳巡撫

無狀欲乞罷免等因臣一讀不勝錯愕夫國家受命
取象山河不崩不竭清寧之兆一旦涸竭關係匪細
區區西北一隅寧係此異常變故耶周時山川皆震
伯陽曰伊洛竭而夏亡河竭而商亡周德若二代之
季矣其川源又塞塞必竭山崩川竭亡國之徵也夫
伯陽而愚人也則其言不必信伯陽爲周在下史孔
子就而問禮則其言爲有道之言矣是可不惕然懼
憬然悟乎數年以來平地山湧於熙州河水潰決於
中原霖雨連綿於江南旱魃屢突於北地咎徵已見

告於天矣倭奴難發於海邦桀酋禍起於黔蜀揭竿
屢逼於稅使脫巾幾見於邊方咎徵已見告於人矣
然未有黃河訖固若此之異也黃河發源於崑崙流
注於東海轉折中原回曲萬萬里西北藉以限華夷
東南藉以通漕運天地之元氣生民之膏澤誠我國
家之血脉也人無血脉則難以生國無血脉則難以
立今潰聚於中州則腹背有癰腫之患涸竭於西北
則頭顱有枯槁之虞上枯槁而下癰腫未有能國者
也臣觀今日之時事其癰腫枯槁多矣堂陛孤睽則

上下之精神不通百職空懸則四肢之宣效無力忠
言逾耳則下情之壅遏不伸賢才擯棄則正氣之消
阻太甚狂多淹滯則冤氣之充溢何極邊方扶同則
中外之氣脉不聯議論浮生則膏肓之隱疾不治軍
士病困已極而朘削無已士風貪墨成癖而懲創不
力紀綱法度日見廢墮兵馬錢糧日見凋耗其所以
消阻元氣滋損精神者更僕未易數至其剝心割髓
敲骨取肉者無如貂璫諸使鑿山斷乾坤發生之脉
權市失萬姓樂生之心遂至天地之元氣湮鬱而不

通生民之膏澤屯闕而不暢國家之血脉消竭而已
盡黃河由是告涸矣昔博士許存仁進講尚書洪範
篇至休徵咎徵之應我太祖高皇帝諭之曰天人
一理必以類應昔君能修德則七政順度雨暘時應
災害不生不能修德則三辰失序旱潦不時災異迭
見其應如響又諭侍臣曰天垂警乎下人君能體天
之道謹而無失亦有變災爲祥者故宋公一言熒惑
移欽齊侯暴露甘雨應期伏哉聖祖之言萬世聖子
神孫所當佩服而釋患也詩曰敬天之怒無敢戲豫

敬天之愉無敢馳驅余且之變天之怒愉極矣可復
視爲尋常故事修金泥玉檢之虛文頒祈禱禁令之
末節而已哉伏乞體 皇祖克畏之心思周詩敬天
之言亟下罪已之使更次第修舉庶政釐革衆弊則
君德修而上蒼可格人事盡而天變可回其所以奠
宗祖于磐石鞏 皇圖于億萬年者當永永不替矣

天災疊見非常聖躬憂勞甚切懇祈轉念修實
以期挽回天心疏

白

瑜禮科右給事中

萬曆三十年四月

夫上天以所生之民付王者撫民則民我后虐民則
民我讎上天亦以所生之民責王者修德則示治徵
否德則示亂徵勿謂天遠天意在民勿謂民微民命
在我其響答影隨萬萬不爽臣特罪禮垣職當問災
異於四月初一日在科看詳章奏見禮部一本災旱
相仍雨澤未應懇乞 聖明亟圖修省祈禱以迓天

休事大都指今歲人春至夏雨澤稀少風日亢厲二
麥就枯西成無望忽於三月二十二日日色黃赤如
赭二十四日大風埃塵蔽天竊冥晝晦等語奉 聖
旨是今年雨澤未通旱徵數見朕心深切儆惕着百
官同加修省照例停刑禁屠仍就應祝神祇竭誠祈
禱毋得怠忽欽此 臣 莊誦再三深歎我 皇上之畏
天恤民超古而軼今也尋果雲布雨施萬姓懽呼
皇上之隨禱隨應如此未久雲氣一掃若有所靳而
不欲雨者 臣 竊訝之尋又接陝西總督揭帖黃河涸

二十餘丈矣若有所斬而欲斷流者臣又竊訝之據

占者王兵王旱王亂取證五行臣不敢妄言符驗救

者以爲減膳撤樂避殿暴露陳特燔帛以答天譴臣

又不敢孚慕具文臣第卜之人事旱者悍也君持亢

陽之節暴虐於下而旱魃應日者主生養恩德人君

之相也政理太平則時日五色不然反是風者天地

之使君之令也出號令不合民心則大風震室巨木

飛舞河者鴻流導積石驚浪下龍門古稱千年清九

里潤者一旦斷流而可渡卽君之屯膏而未廣也言

及至此動關君身宜何如以惕省之然傲惕以實不以文修省在心不在迹是在我 皇上以前念後念昔旨今旨惕惕而深省焉廢棄去國投荒省之在聖度優容罪羈動籥鳴條省之在聖中矜釋至礦稅一節又不可不省者 皇上有能爲堯舜之資堯舜之世無事不堯舜倘毫有缺失怨咨輒興今當憔悴易德之日俄行寬征薄歛之條譬之饑渴皆佳味解懸皆安處也一旦便登唐虞矣 皇上何憚而不爲之省之於理不可不罷 皇上當樵採之初四海尚有

餘饒今歲復一歲五丁索而寶藏盡官庫索而積貯
盡閭閻索而皮骨盡以索者吞盡者猶之湯禽涸魚
其將焉之是亦不可以已乎省之於勢不可不罷

皇上數年以來炒砂鍊金採龍剖珠飼蠶製錦何所
不有一旦取四出食肉之豺麀歸之禁廷則既收帑
藏之實又收史冊之名豈不兩利俱存省之於利不
可不罷 皇上諭行之後倏然復令照舊管事此有
勝氣而肆蠱滋毒彼有雄心而操戈以向江右甘心
潘相遠左甘心高淮淮上甘心陳增畿輔甘心王虎

滇南其心楊榮舉東關西甚欲其心梁永李鳳害且
有不忍言者臣恐瓊林大盈之積不足以當斬木揭
竿之費也省之於害不可不罷惕焉而猛思修弭省
焉而設誠果行則天命不難挽祖宗二百年所眷
佑之天命也民心不難收祖宗二百年所膠結之
民心也如此而不反災爲祥易亂爲治臣請其謬言
之罪臣無任觸髮懇禱之至

天變人離萬懇省收疏

李三才

漕運都御史
萬曆三十一年九月

竊惟人之畜犬以伺夜也脫有大盜不利其主將焚而室廬劫而財貨主人弗覺也當此而犬不盡力一吠是無用之物也君之用臣以濟國也脫有大禍不利其君將擄其民人危其社稷人君弗覺也當此而臣不竭忠一言是不吠之犬也 皇上養臣三十年餘矣當今時勢岌岌矣臣欲不盡言耶心自有所不能忍誼自有所不容已無論耻與犬伍矣臣欲盡言

耶又恐視之爲故紙聽之如飄風曉曉口舌直取厭
惡耳故迅雷擊陵大風拔木洪水滔天萬民爲魚尙
可不謂之天變乎臣報聞疏中不敢一及礦稅之事
恐皇上疑臣爲挾爲誣併此天變而亦不信也趙
古元方磔於徐李大榮復梟於毫睢盜又有六志異
人更多秘謀尙可不謂之人離乎臣報聞疏中不敢
一及礦稅之事恐皇上疑臣爲要爲妄竝此人離
而亦不信也然今日民力必不能支民生必不能保
民情必不能堪民亂必不能止當此大難將作之秋

天人共憤之日臣雖欲爲全軀保家之計亦不得已
臣又惡能匹於言哉欲言維何惟願皇上且遂罷
礦稅而已益此爲萬民剝膚之災國家燃眉之禍必
須急下此令稍收人心而後其餘失政次第再舉耳
此臣親歷之言灼見之機非尋常疏奏聊以塞責也
且皇上每有催徵必曰內府缺乏矣不知天下百
姓更缺乏之甚也夫使內府果缺乏也是社稷之禍
靈長之慶也所謂貌瘦而天下肥也所謂仁者散財
以得民也缺乏在一小而充盈在天下也然而實不

然也 皇上之所謂缺乏者黃金未遍地珠玉未際
天耳天下百姓之所謂缺乏者朝夕不一飽父子不
相守耳以此較彼孰之孰足孰緩孰急又何待臣
之畢哉 皇上加意京邊每曰惟正之供矣 皇上
以此責戶部戶部以此責撫按豈不光明正大哉不
知必無旁搜曲取而後惟正之供不闕耳未有千頭
萬緒搜括無遺百孔千瘡膿血殆盡而猶責之曰惟
正惟正不亦難哉若旣旁取又足正供 祖宗之朝
當先爲之矣漢唐宋諸君更先爲之矣何待今日哉

然先朝列聖所以必不敢如此者正恐天變人離致有今日耳臣無暇遠及姑卽臣之境內言之淮徐豐沛巨浸千王鳳泗潁亳間閭一空壯者散之四方老弱轉乎溝壑乃取之於礦稅取之於蘆洲取之於塩課取之於田房納之於公家者什一吞之於羣小者什進何取非財何財非民是不數倍於正供取不但也也有進貢之夫有塋碑之夫有修陵之夫有挑河之夫每差不下數千每家不下數兩何夫非財何財非民是不數倍於正供耶其餘本地存留如官吏

之俸糧兵役之食餉驛遞之馬匹城池之工料又不
可屈指數矣卽此無食無衣之民而尙加以見徵帶
徵之役就此且逃且死之衆而更責以如山如河之
征箠楚不停聲桎梏滿路衛官惟求罷民惟求死此
等景象凡有見聞無不下淚況以一皇上之仁明有
不泫然出涕者乎又何忍曰內府之乏惟正之供耶
惟知內府而不虞外府旣困旁求而又責正供蠹蠹
愚衆固恨趙李諸賊爲變之晚耳吁可痛哉故皇
上毋謂臣禍亂之言盡爲未必然也夫惟其且未必

然也故臣先爲言之欲皇上及早收拾使不至於然耳若事已然矣豈惟臣言無益更當置國家於何地皇上於何地百萬生靈於何地耶又皇上母謂前日自有停止之旨遂可以塞人心也一日不停百姓復受一日之害一日不止國家則釀一日之禍況今九邊有告急之文徵解有考成之限叅罰官吏催地里甲萬室真如倒懸百姓實在水火又何可以聲音笑貌羈縻而籠絡之也夫言者不同聽言當異臣原非科道之官不專言責之寄言卽言其所事行

卽行其所言故言趙古元則實有趙古元言李大榮則實有李大榮言天變則天實爲變言人離則人實已離出之於口徵之於事一事不實卽爲欺一言不實卽爲誑故無事則不敢言有事則不敢不言耳皇上奈何槩視之爲風聞例比之爲影響而漠然不動耶爲今之計惟豁然天開斷焉身改大彰明信一伸前旨凡屬磻稅盡數報罷而後側身修行圖安於危密謀於輔臣聚議於部院采聽於臺省搜羅於百司一切遊幸玩好之具却之若鶴在逸欲驕盈之志

窮之如讎寇凡自近年以來但有不便於民者令各處撫按據實疏奏一一改行俾二祖列定安養之衆猶得還定而安輯四海九州草澤之雄無復藉口而生心凡在有位方且將順奔走之不暇又何至喋喋勞勞以言語取憎惡哉夫日月逢蝕而明益光帝王知過而治益懋是在皇上及早省改而已臣身當水旱盜賊之艱目擊流離死亡之苦誅求之責見今百萃於臣誅求之令見今百下於民一面賑之一面徵之一面救之一面戕之終之恩不勝怨德不勝讎

奸雄思逞勞民攘亂

臣

且如之何哉禁之不可撲之

不能卽

皇上責

臣

不職誅之而已死之而已其何

救於地方哉又何救於國家哉

皇上得無悔是耶

臣

事中之人事中之言理無敢欺勢難久待故復叩

心泣血激切上請竭其愚誠自比伺夜之大殫其衷

赤用彰養士之恩惟我

明聖蚤發天聰亟垂睿照

毋更置之如前坐以待亂也

臣

無任悚息懇祈待

命之至

天時大亢感格有機乞裁省以凝休命疏

汪若霖

禮科右給事中
萬曆三十一年

臣惟王老柄神與天地相應休咎之來盛衰自起是故大有之世時和年豐天心叶鬯以下昌明饑饉之朝陰陽舛盪天方薦瘥而國亦隨之春秋每災必書其於大旱不雨尤用拳拳漢臣班固至總其說以爲列國敗亡之徵則燦然矣今年有春徂夏雷雨不施風霾時作輦轂之下如燄如焚麥秋不登米值轉湧百官萬姓莫不仰天哀籲而高高在上若無意於天

下而故顯示以亢閉之端者可不畏哉易曰天地交而萬物通也則爲泰天地不交而萬物不通也則爲否 皇上以爲今日泰耶否耶天心之仁愛 皇上也至矣頻年星搖地震霖雨孽火之譴告亦已勤矣於是乎變窮災盡而枯旱乘之比父之於子譙責無何則含怒蓄忿嘿不相關而其愛將有所移 皇上安可不察其故乎周宣王衰主耳雲漢之章靡神不舉顧瞻大命昭假無羸竟以中興卽 皇上初年徒跣南郊惻然憂勤之狀豈異代能法奈何今日不聞

穹禱也蓋臣愚冒死妄臆卽圭璧旣薦有類周宣猶以爲天心之響答不在是也何者人主法天天亦應人主今朝政之過鬱與天時之旱熯若相激矣 皇上聖神文武駕軼古今始之有銳然總攬之志而因以有精察矣始之有劃然揀擇之心而因以有停閣矣於是爲壅塞或大塞而小通或方通而忽塞中外皇皇如農望歲而宸禁天嚴莫敢闕測卽今以旱請禱部省交章尚從中格不亦異乎 臣愚蓋竊惟洪範五行之旨而有憾於今日也傳曰言之不從是爲不

又厥咎僭厥罰恒暘夫言者天下之風聲脉理也不
順則亂虛譁之氣發爲驕陽其理固然今夫郊廟宜
親朝講宜舉東宮文學之不可以久輟也諸臣焦唇
敝舌而不能得 皇上之一諾者姑勿敢賾試摘近
事盖有上言之而或以下移者則詔權務于有司而
二三猾闇輒伏狂誕也夫泉貨已壅而璫焰不熄民
間愁苦之氣終安銷乎有上言之而疑于中變者則
廢謫及行取諸臣明詔尚沉閣也夫賢人伏于下則
國空滯于上則政無紀 祖宗朝有拔之囚纍而不

爲嫌寵之新進以作其氣者可終淹乎有上屢言之而屢持不決者則中外大僚之開寫爲故事也國家倚重臣則不得大恡重權猶豫之下脅亂易生蕭索之極痿痺已著且如虜釁方開而督撫可終置耶蓋又有下言之而上弗斷者則今被劾諸臣之進退不可不決也清議不行消長靡定至議斥者或以不肖及賢議留者又以賢及不肖悠悠世態將安底乎有下紛言之而上爲徇者則一事互辯如宋承恩之疑局是也夫被擄卽不可爲罪乃失軍亦安可爲功國

俘得爵冤揭可猜至以多人而置不問以未奉旨之
衆論而遽謂明白則綸綰亦大棄矣有下錯言之而
上易眊者則兩地異揆如安疆臣之詭態是也夫身
則托於黔而苗夷之擒斬頗多頭目則肆于播而內
地之投校特慘陽順陰逆出沒無端勿亦水西之侵
也長其雄心而有所憑乎凡此在上則爲主令之未
宜在下則元國是之未定積鬱成沴積僭成愆人事
既彰矣天氣乃見至于炕陽孔赫毒茲畿邦藐矣皇
穹精蒐不貫此其爲患豈在流離盜賊間皇上安

可漠然而已哉伏惟 聖明穆清坐照陟降式臨思
天命之難諶察庶徵之不與需發德意勿少怠荒萬
幾之裁割若流羣議之昭明如電布令則四時各守
其信用人則五行竝効其能解澤旁通和氣遐暢自
廟堂以及海隅振滯噓枯熙熙皞皞何啻甘霖之蘇
萬物也而謂天意有不協應以永豐亨者哉夫桑林
之禱六事自儆災厲之移三言攸致古之人主非好
自貶損而固爲是兢兢也伏惟 聖明留意省圖
愚不勝戰慄待 命之至

同察天人之故以儆有位疏

汪若霖

禮科右給事中

萬曆三十二年五月

頃該禮部題爲祈禱雨澤事奉 聖旨雨澤甚微麥
秋可慮朕心深切兢念便行與順天府率屬虔禱各
應祀神廟以沾足爲止毋事虛文欽此仰見我 皇
上憂國憂民拳拳無已宗社幸甚顧今不但雨澤甚
微乃更冰雹爲厲四五月晦朔之交連日暴至沴氛
雜沓尤爲可異臣聞之五行傳曰雹者陰脇陽也在
易四月爲純陽乾卦五月爲垢一陰始生陰遂迫陽

爲災特重臣察其故乃臣下奉公不效務專一之所
致也春秋釐公二十九年大雨雹爲公子遂昭公三
年大雨雹爲季氏皆徵表不爽自昔患之今 聖明
在上乘乾獨運則莫敢不欽然竊惟在廷大臣單隻
曠缺股肱喉舌之任纔各一人乘偏積重未知底止
天下之勢惟一則專專之爲害雖公猶私顧安得竭
誠盡力臣憂國如饑渴者年來流俗相仍寢假難制
刑臣患於無章是非不求其至善良孤藐師濟鮮聞
士大夫務設陷穽以相鈎覆而不階於蕩平之路殆

不可解是故上下相引大小相煽黑白不分開閉自
如視事者售巧於深文蒙詬者嫁禍於善類又有一
立淹蹇無聊之士入幕深堅不恤外議簞鼓儕輩飛
語四囂或曰某事將行某言者誤之或曰某人有言
某同類者嗾之仇塞患蹇之門挑剔朋黨之釁譁張
爲幻相怨一方使過歸於我皇上責謝於衆人合
天下之爭顛倒紛紜而坐待其變可爲太息觀今日
時勢亢閉已極恐有一旦冰搏潰決之症爲國家患
其狀類雹此皆大臣積專一之漸疏禍必至勿足怪

者先王之制惟天子一人至尊無對其下三公九卿
百執事以相叅也故權有所制而物有所平師師濟
濟虞周太和之盛道不出此伏惟聖明察五行之
微稽易春秋之旨嚴勅廷臣各矢精白宏開衆正之
途竝適太平之軌可否相濟陰陽得所形和氣和天
心叶應社稷無疆之福恒必由之何四時雨澤沾足
而已臣心塞臆不能盡言惟在聖明留神省覽

天怒人愁主憂臣辱謹直陳失政以弭異變疏

趙世卿

戶部尚書

萬曆三十二年六月

臣嘗謂多主于震卦其大象曰洊雷震君子以恐懼
修省夫恐懼者畏范也修省者改圖也由畏思改當
必有不俟終日者而豈止中命之虛文耶六二之爻
曰震來厲億喪貝夫厲者患害也貝者貨利也因害
散利當必有惕于其大者而豈惜聚歛之末計耶臣
謂今之時事與震之象交適相合焉頃者皇陵雷
火陵松蟲食禾不謂震來乎致警宸衷屢頒明諭

則曰天威孔赫哀痛悚慄可不謂恐懼乎二則曰五
內如灼心神恍惚可不謂厲乎然所爲誓修實政者
至今未見舉行而所爲必俟次第者未知舉以何日
臣竊謂茲時宜亟于修省而實政莫先于喪具也自
殯稅四出慘毒萬端戕生命于三囊盡脂膏于一網
剝肉竭髓十室九墟誠莫必旦夕之生不少緩須臾
之死望况水火而無主將叫闐闐以奚從焉知窮愁
徹而無皇天后土之悲呼者乎焉知憔悴剝膚而
無匪功宗德之謳慕者乎所繇玄穹爲之震怒九廟

爲之泣事有漸積變不虛生故曰人主之情上通
于八怒氣偏則激爲雷霆法令枉則多蟲螟試觀兩
者獨警于祖陵而迭災見告于今日豈非精氣相
感而幽明共憤耶以此思震震可知矣不寧惟是卽
今盛夏屆期涼燠失序雷電頻仍霖雨流連旬日晦
冥天光慘淡旣忒陽明之令稀瞻開霽之形此曷故
焉夫皇之不極厥罰常陰吏所記也君令不收則多
澤雨占所示也今果能皇建其極乎自有停止之令
果能信如四時乎以此思震震又可知矣我皇上

神智仁孝超軼今往誠不難灼利害之勢坐致變災
爲祥之徵亦不難一轉移之力立臻易危爲安之理
迺近日以來徒憎惕聖慮違豫聖躬固云憂矣孔子
曰憂所以爲昌也然又不曰勿憂宜日中宜照天下
乎今但聞憂危願治之言未覩畏天敬祖之政則何
益焉此臣莊誦屢諭而拊膺痛心恨不身代因仰體
聖慮所分憂共戚不能已于躬責也蓋今所最失者
轉員之政臣所冀職者至計之司迺目覩無藝之征
口侵惟正之賦竭吾殫唇而莫能挽回于上焦心窘

引河莫效伎倆于時陳力罔忠格君鮮術斯無一長
云日兩負矣卽鞠躬盡瘁率屬交倣亦奚裨修省之
實而克副休戚之誼乎 皇上當今之時尚不亟解

倒懸以回天怒誠不能一日自己臣值此時而不亟

回 聖意以除弊政臣亦何能一日已乎 皇上爰

痛自刻責更進藥言臣聞古君人者其慘怛于民也

國有饑者食不重味國有寒者冬不披裘歲登民豐

乃始懸鍾鼓陳于戚君臣上下同心而樂之國無哀

公若取民不裁其力求下不量其積使民不得事本

業以供上求力乏積匱君臣俱困斯無以被天和而履地德矣所願我皇上試從一身之弗豫而遙想萬方之疾痛愁苦則痾瘝自切也從一時之深畏而反悔平日之怠玩恬愉則改圖自猛也于是亟回時政之貪戾以收人心先罷臣愚之曠尸以謝天下極弊既革百廢繼興將德日精明體愈彊因逆天休而歆祖正端不越此卽易所稱震來虩虩恐致福者也

任延頸拭目伏乞

聖明採納速賜施行

淫雨異常人心驚懼伏祈聖明省察亟勅交修
以回天變疏

汪若霖

禮科右給事中
萬曆三十五年七月

臣惟有天下者必重于陰陽之變以待天心然後朝
政應節而人情不懼今年六月以來陰雨不解澤水
爲災乃至晝夜如傾風雷交惡飄忽震盪萬類洶洶
仰勤聖明軫念下令祈晴而雨性轉勃未衰歇都
城內外大浸稽天壞廬損稼漂溺殺人國家二百餘
年殆未數見非細故也臣無狀不敢妄言謹考之五

行傳曰貌之不恭是謂不肅厥罰恒雨又曰廢祭祀
逆天時則水不潤下王者動作威儀上應于天今九
閭邃密禁不聲聞臣下未由仰明威而知懼者上嫚
下玩綱紀無章不可謂肅夫祭祀大事也謹郊廟則
必畏天地祇祖宗發號施令莫敢逾時今遣代爲常
但勤諭旨諸大政太議輒見沴鬱非所以和陰陽成
萬物也臣又聞雨者陰氣沍者陰物陰盛則雨災竝
見六應在禁闥及臣下有邪謀夷狄侵中國也皇
上神武手持太阿卽在深宮豈得有望嘽笑而窺深

漢者

臣

不敢知惟是東宮三年不學有曠師傅之義

諸

上觀望莫敢請命

臣

竊患之凡人臣外掩物論以

榮上則主內賒主威以驚下則亂非必他逆節也今

大臣翼翼無敢越軼然率比周相樹植耳小臣趨風

者益又甚衆憲高設阻侮直諱忠繇此道以安國家

邱社稷

臣

不敢信詩云不寧不令百川沸騰咎乃在

于皇甫卿士蓋自古而然矣往歲大水都城圯支虜

訐上谷而京師震今漢威令非不行也順義未定部

落多驚西南夷印制于一婦人之手仇殺太慘而東

北剽掠時至頗相覆匿耳加以太倉拓掃各鎮枵敝
何以待之漢文帝三年秋大雨水溢藍田于時匈奴
侵北邊連年征討百姓愁苦而宋宣和間都城大水
李綱請求直言不報尋有金人之患可不寒心凡此
皆成說故事叅之今日誠足震懼未可謂適然以齋
禱爲文而已也伏惟 皇上惕然修省奮發乾剛振
肅朝義一切政令慨賜施行憲天法祖爲燕翼至計
仍 廷臣各矢精白深維燮理之方申飭九邊將吏
綱繆先事以振國家庶陽氣昌明陰邪自退堯舜儆

子之慮正在于茲若夫中外流離單恩賑濟則有三
十一年故事付之有司可矣臣愚無任激切之至

生民糜爛已極天心示警特嚴謹循職掌率屬
申懇亟行切要實政以光聖治以信聖言疏

趙世卿

戶部尚書

萬曆三十五年七月

竊惟國家之治行百善政不如舉其要革百弊政不
如去其尤況乎異常災變予以轉異爲祥尤關盛衰
理亂之機毫不可苟頃者首陵異變孽火燒樓妖蟲
蝕樹近且陰雨連綿諸陵之神道橋梁衝潰漂淪又
見告矣向奉諭劄再三屢以切要實政爲言顧切要
之實政原非難見何俟遠求今天下之嘉師隅泣而

不得沾聖天子休養之恩者豈非礦稅爲之梗哉則
今日實政之當修更孰有切要于此者臣等敢臚列
其槩臣聞古者聖帝見珠璧而投明王以金玉爲賤
誠見夫瓊瑤在御原無救于饑寒精盪盈箱初何關
于身命心堅無慾法作于涼用能世培永基人傳令
譽卽霸國之主尚能卻照乘之珍鄙白珩之寶何況
魏魏魏恩恩天縱之主乃至以貨聞哉歛蒼生之怨氣
割世之榮名竊爲皇上惜之是以君德之切要
論則礦稅宜先罷也天下之事害與利相倚散與聚

相因利小而散之速則得害尚輕利大而散之遲則
得愈重故聚歛而菑害叢生大學致詳於末簡好
利而不為不饜軻民垂戒于首章盖多取所以招尤
慢藏原能誨盜小之垂棘屈產不收假道之危大之
鉅橋鹿臺自取倒戈之禍歷數後來千禩一轍是以
禍本之切要論則礦稅宜先罷也古者國家無事則
議桑土之謀有事則議金湯之策君臣殿陛以譚經
論道為常經薄海黔黎以耕田鑿井為本業安有斷
空四海之山樵及三家之市驚蛟龍之睡窟剖螺蚌

之生胎操戈挾矢如嚴太敵毀屋踰城如補亡子經
十數年而不休者是何法絕成何世界是以治道之
切要論則礦稅宜先罷也自有礦稅以來貂璫漁獵
翼虎包然掘墳墓而枯骨寒心奸子女而淫汙掩口
素封垂罄已寸室而九空白骼塞途且十人而九死
以致恨曲愁歌人與爲怒火焚水葬家與爲讎此而
不已爰將何極是以人情之切要論則礦稅宜先罷
也地生財止有此數國家正賦止有此名自權採
一興生民之骨肉既多斃乎羣虎之爪牙生民之脂

膏又澁潤于羣奸之囊橐邦有碩鼠澤無歸鴻以故
虧「來催拖欠而拖欠絀稽關稅而關稅微取契錢
而契銀力搜庫藏而庫藏絕課鹽筴而鹽筴薄求贖
錢而贖錢銷外麻帛空司農若掃仰屋而嘆莫知持
籌是以惟正之切要論則礦稅宜先罷也王人出令
信比四時錄皇上四年以前嘗曰朕心仁愛自有停
止之時夫政虐而後停止善政則曷用停止爲矣停
止而後稱仁愛未停止則曷稱仁愛爲矣不安於心
而姑徐俟於後日以繼日更待何日或可待而民

安能須玉音且爲及汴天子而有戲言赫赫皇綸
豈應如此是以先後聖諭之切要論則礦稅宜先罷
也前勅諭初頒有缺官宜補罪囚宜釋之命載微之
士且曰礦稅未罷則庶官未必補也何也天下之監
司方面皆心欲庇民者也皇上左任紹瑄以漁民
而肯使庇民者濟濟布列乎是庶官之不補也礦稅
之一令壞之也又曰礦稅不罷則逮繫未必釋也何
也敕諭詔獄強半爲礦稅而羅織其中者也皇上
方欲立威以獨行其權採之意肯遂釋此輩乎是逮

鑒之不釋也亦礦稅之一念橫之也夫皇上之取

礦稅爲帑藏之竭耳臣等素無桑孔之策而令皇

上以礦稅朘民生致使銓部不得補其官法司不得

恤其獄九列曠官自臣部始臣罪滋大臣懼滋深是

以政體相因之切要論則礦稅宜先罷也皇上果

以蠶蠹小民服役自我駕馭自我刑賞自我死生自

我唯我所命而不足介意乎臣等以爲皇上之所

謂不足介意者正其所當注意者也姑不敢近陳莫

大之憂遠作不然之慮卽皇上臨御以來三十餘

年所矣所謂供七襄九就之衣者非民耶所謂備八珍九鼎之膳者非民耶所爲供乾清坤寧離宮別館一切土木之役者非民耶修三加之儀則民備冠服講大婚之禮則民備筐篚上慈闈之聖壽則民備甘旨謁天壽之諸陵則民備羈勒介第之分封諸王之出閣則民備輜軒齎果黃流爲梗漕艘愆期則民備疏鑿幸免西征哮拜東伐倭奴南滅播酋北禦強虜則荷干戈而供芻粟以致身亡寧武首喪九邊血浸鴨綠之江而肉填夜狼之窟哀哉斯民於皇上試

一靜思之自服食之微以至宮闕自慶吊之類以至
征誅自周廬之近以至海寓何嘗有錙銖不取之民
間何嘗有晷刻不用之民力是民亦何負于國者乃
民方懽呼以供 皇上之欲而以皇上不少遂其欲
民方奔趨以釋 皇上之憂而以皇上不少去其憂
民方贊勇以壯 皇上之威而以皇上不少霽其威
民方竭蹙以赴 皇上之難而以皇上不少恤其難
竊意 皇上正靈臺卽雖堅如金石時亦有所不忍矣
夫民心卽天意也祖德卽民瘼也故 皇上力能以

礦稅而傾民之家室夫且以雷火而燬祖陵之明樓
皇上力能以礦稅而吸民之脂膏天且以妖蟲而蝕
祖陵之松柏皇皇上力能以礦稅而轉民於溝壑天
且以霖雨而決祖陵之神道橋梁夫人雖至昧未有
不念祖祖宗者人雖至微未有不顧墳墓者故兆不
在他而獨及于皇皇上最所傷心之地此非小異也
晨北未入而昭陵之墓柏先摧泥馬初南而輦洛之
枋題預墜祖祖宗陵墓之災祥其關於國家興亡者
若此今之孽火妖蟲淫潦流奔恐不止唐陵之摧柏

宋廟之朽題已也故臣以爲欲回天意當先收民心
欲收民心當先罷礦稅以與民更始而示天下以修
省之實益修省之要躬行不在多言而實政之行心
決無勞再計今日之事誠當皇皇汲汲如捄焚拯溺
而不可須臾緩者不然人不可欺言不可食況皇
上誓發於口而天地祖宗寔式臨之祖其可屢誣
天其可屢誑耶臣等民部也職在民則言民觸目激
衷敢同燕雀之處集思補闕願輸犬馬之忠伏望
皇上俯鑒羣情速賜採納施行臣等曷勝惶恐待

命之至

都城水災異常時事可駭懇乞聖明痛自修省
以回天變疏

宋一韓

兵科都給事中
萬曆三十五年七月

頃者霖雨爲沴京師平地水深五尺其下窪深至一
丈民居蕩析殆盡至于解生蛙朝有魚從來所未聞
也及雨霽三日正陽宣武二門猶然巨壑奔濤輿馬
不得前城闕不可渡茲可不謂大異乎夫一緯一度
有錯無害于民聖人猶必惕然自戒矧茲大水漂都
邑溺人民壞公私廬舍甚衆皇上豈不惻然動念

必且密禱交修避殿徹懸以爲文必且恤死問孤賑
之調饑以行德此皆臣所望于陛下之實也臣聞

回天怒者必求當其心當天心者必類証其事臣不

習徵諗亦不知類應何屬臣常取前漢五行傳反復

讀之其篇中所言多誅伐祭祀及小民外戚夷狄宦

官之事臣恍然有悟以陽召陰得之今日可省者數

事春秋桓公元年秋大水法曰不誅首惡赦其衆是

謂亟陽桓于是受賂緩賊交兵結仇是其應也今或

有網漏吞舟沉寃未雪者與桓十三年夏復大水法

曰廢祭祀之罰桓于是易許田不祀周公是其應也
今秋望未親鬼神得無所怨恫者與嚴公十一年秋
宋大水法曰百姓愁怨宋氓公曰于是驕慢暗災不
改是其應也今坐四者相望百姓果樂業無譁者與
成公五年秋大水法曰政在大夫成于是城鄆以疆
私家臣下有顓位者是其應也今大臣有忠敬之誼
或亦有偏執自用者與漢高后比年郡國大水流千
萬餘家或爲諸呂相王之應今戚畹多馬竇之風或
有未盡由禮者與文帝后三年秋大雨水流九百餘

家壞民舍八千餘所或謂匈奴愈驕侵犯北邊之應
今北虜莫亦有爲謀叵測者與元帝永光五年夏及
秋大水壞鄉聚民舍水流殺人或謂刑臣用事之應
今貂璫有驕命橫行者公議可終廢格與凡此皆臣
之所謂可省者至于洪範庶徵所謂狂恒雨若京房
易傳所謂辟過有德厥災水此尤關係聖德聖政至
喫緊也 皇上首發勅諭交倣臣工次發德音賑救
災民仍以時事本合往訓關係聖躬者設誠力行之
關係各衙門者按章奏而斷舉之是謂修省實事

臣

所謂望于皇上當矢心回天變者端在此矣伏惟
聖明裁察焉

陪京災沴異常天心仁愛彌切疏

楊道賓

禮部左侍郎

萬曆三十六年六月

南京禮部等衙門各揭帖開稱為留京水災異常天心譴告宜懼懇乞聖明亟修實政以圖消弭事

臣

讀之不勝悚懼考之故典霽雨不收水流國邑厥應
甚鉅傳曰陰氣盛也水涌為災災而入城市沿街衢
則又異災而見于皇祖龍飛之地奉先殿大庖厨
槩行滄漫則尤為異蓋去歲京師水災內而禁地外
而官民廬舍無不傾圯而今歲陪京亦復如是天意

若曰輦轂示災既不爲動舊京爲皇祖肇基再加

譴告能無懼乎臣等蓋知天心之仁愛皇上無已

時也三吳根本重地財賦隩區人心皇皇禍變將起

修事修教各有司存無俟臣贅臣禮官也雨暘不時

咎在臣等除循往例恭候命下百官素服三日痛

加修省以祗天戒外竊惟皇上天之宗子一敬一

肄呼吸相通臣等萬心之所計慮不如皇上之一

轉念萬手之所拮据不如皇上之一舉筆令時政

廢墜聖心豈不明灼但聖斷未決耳如朝講當

親大僚當補考選當下廢棄當舉邊餉當處閣部言
之既詳既懇間亦屢奉明綸一則曰卽俟檢發一則
曰稍待檢發夫卽則不必俟稍待則不宜久而日復
一日月復一月其將何時臣雖更有條列無能加于
閣臣之詳懇但祈卽聖心所已明者斷而行之無
使人謂天語煌煌徒爲推延時日之資則幸矣顧臣
等愚慮竊謂禍必有基不大破其積習口舌之爭能
得有幾譬之病必有根不疏通其脉絡標急之治終
難霍然勢已亟矣天之警戒皇上更切于天下臣

民之控訴矣若臣等猶然泄泄拾已唾之餘強聒塞責而不盡言或耽戀儻來之榮瞻前顧後而不敢言是爲負天負皇上負所學臣其何敢謹摘今日釀禍之源列爲五款皇上必銳意改圖而修省之實效可冀焉一日葆清明平旦之氣以澄聖衷臣聞古帝王未明求衣非但勤事良以嚮明之際萬慮俱澄孟于夜氣之說正爲此耳皇上深居靜攝念何嘗一日不在萬幾然臣等側聞宮中起居夜盡方寢輒時未起表時值嚮晦陰濁用事况至夜分神疲氣

倦於此時而有裁決安得合宜迨及平旦正聖心
清明之會而反就燕息牀第消磨起視日晷又將向
晦矣則氣何由澄神何由定嗜好所以蔽錮喜怒所
以多偏忠讜所以難入批發所以愆期外廷諸臣見
焉皇上之忘天下而不知夙興夜寐之間蹉跎許
多大事也以皇上神聖遠邁虞周誠試雞鳴而思
待旦而行則必知盤惑姑高淮決不可不誅稔監決
不可不撤循吏如蒲朝薦無辜姦王邦才等決不可
不有雖未卽視朝而神謨雄斷當不崇朝而馳萬里

是謂天心復而陰濁有不澄者否矣崇禎每月召閣
部大臣入對以決壅鬱夫耳目聽覩則是非較然筆
札傳聞則疑信互半閣部諸臣皇上所與共圖國
事者也而比年以來天顏日遠股肱心旅目見隔
絕憂危深心旣未易悉之簡牘補綴屢奏又未易徹
之旒旒上不見緩急之形則欲行而輒止下未得要
領之歸則愈揣而愈疑政事壅廢人情猜阻職此之
由以皇上之寬仁明察若使天下事得一一指數
于前裁決何難況一月中御便殿聖躬亦不爲勞

一召便有多官則私言無從蔽隱非止情事了然抑
且人品洞燭矣日之間收觀易聽政事必然精采人
心必然聳動是謂泰交成而陰沴有不消者否矣一
曰復章奏批發之規以尊主權往時章奏之下皆
有定期但有從與不從並無下與未下留中之起蓋
或事有難處意有未便以爲臣等留中可泯形跡杜
口語然亦偶一爲之耳豈意此端既開遂成否齟至
于今下者爲曠典未下者爲常事而皇上見爲行止
自由大權在手不知章奏之人既不必其出則入又

安必其入人而不出章皇上主之矣入而不入竟誰
主之况批紅覆奏轉展遲速之際能無煬灶之奸臣
恐權之潛移而不自知也願皇上察此情形斷自
聖心勒定期限或幾日迭稟幾日批發倘有不當明
示駁正行止遲速顯然與天下共睹斷絕留中之敝
政庶左右不得上下其手主權不至旁落於人是謂
乾剛奮而陰翳有不決者否矣一曰慎內批中發之
旨以杜羣疑我皇祖設閣臣所以備顧問代絲綸
也凡有章疏必擬自閣臣昧自上裁庶萬幾不煩而

理而今有不由閣票徑從中出者矣如近日考選一事兩奉中旨有部寺相託言公言私之語是果出

聖意乎則威福自由何不登時處分乃徒屢形詔旨經年未決若非出聖意則誰授此旨以啓紛紜之疑又如近日閣臣同出辭疏竟從內票二發閣票如謂內批特眷悉則諫行言聽斯謂有禮便當亟允考選之請何僅曰卽俟檢發若非出特眷則又何取內批以隆虛拘之數矧皇上久處深宮是非邪正未易懸斷前後左右豈無窺牘當此主上聖時明

固無庸過慮萬一相沿且久矯冒之奸流毒縉紳則
今日開端貽禍不淺願皇上留神章奏悉發閣
擬而後裁決間有時出聖意亦祇傳諭閣臣自能將
順庶善固歸君過無所譏譬則大明當空而陰魔有
不伏者否矣廿日去形跡體面之套以振事功夫蕭
規曹隨原非專顧體面韓范富歐上殿相爭如虎亦
何嘗計形跡乎及數年來閣部專體盡成圈套大小
臣正務爲雷同政事獎壞極矣稍振刷則慮相形人
情情稍捷立則咤爲異目因循以長厚避嫌

怨而若免坐視天下有養癰自潰之形而使志士抱
載胥及溺之恨則人心安得不離士習安得不靡邊
圉將吏安得頗牧之賢遺佚諸臣又安得弓旌之望
哉臣願皇上勅閣部大臣以及庶官務破拘攣廓
然與天下更始期以一德一心爲寅恭無認以水濟
火爲和同譬則雷厲風行而陰鬱有不通者否矣此
五者積習既久釀禍實深 朝講之不親大僚之不
補考選之不下廢棄之不起邊餉之不處以至紀綱
盡弛法度俱廢智士蒿自而憂直臣腐吻而諍而若

罔聞也者祇由此一線之路未通未絕耳今天變已
極事勢之窮蹙已極 皇上不及此時省覽臣疏如
意改圖臣恐天下安危未可知也夫水陰物也又兵
象也宋臣范鎮有言天象見變當有急兵義當死臣
不可死亂兵之下臣等區區微忠實與宋臣心有同
然故不敢避忌諱伏惟 聖明留察